

蓮宗正傳

附法雨涓滴錄

序

粵自東林結社。肇興蓮宗。至今千四百餘載。而念佛往生淨土者。止就今時一隅之地。猶及見及聞。班班可考。足徵從上以來。不可勝計矣。世傳往生集久矣。然所紀者。不啻取一而漏萬也。宋石芝曉師。嘗定蓮宗祖師七人。曰蓮宗七祖。意謂千古相延。接傳正脈者。唯此七人最著。俾後之人。奉爲家法。不致無所宗主。趨於岐路。可謂善矣。美矣。至明而衆舉雲棲爲八。今復衆舉靈峯爲九。梵天爲十。資福爲十一。斯十一祖者。皆智慧功德不可思議。凡淨業之士。既心歸安養。復以慧命爲懷。其追溯源流。而克承其緒。爲何如哉。然未見專書。頗爲遺憾。因是徧覽諸文。摘錄成編。題曰蓮宗十一祖傳。嗟乎。末世衆生。最宜念佛。佛已明言之矣。十方諸佛。又讚嘆之矣。自古及今。念佛往生者。若緇若素。若男若女。若老若少。衆見衆聞。又昭灼於耳目矣。尙何疑之而不信耶。雖然。信則信矣。修則修矣。而知見不正。亦不可也。得是書。則如木工之得規矩。未有不得其正者。道光四年甲申秋古吳後學悟開謹識

蓮宗十一祖位次

- 初祖廬山東林慧遠大師
- 二祖長安光明善導大師
- 三祖南岳般舟承遠大師
- 四祖衡州五會法照大師
- 五祖新定臺巖少康大師
- 六祖永明智覺延壽大師
- 七祖昭慶圓淨省常大師
- 八祖雲棲蓮池祿宏大師
- 九祖靈峯藕益智旭大師
- 十祖梵天思齊實賢大師
- 十一祖紅螺徹悟際醒大師

- 八月初六日往生
- 未考彌陀誕日當供
- 七月十九日往生
- 臘月初一日往生
- 十月初三日往生
- 二月廿六日往生
- 正月十二日往生
- 七月初二日往生
- 正月廿一日往生
- 四月十四日往生
- 臘月十七日往生

蓮宗十一祖傳

清古吳悟開編集

淨業學人恩西重訂

蓮宗初祖

師諱慧遠。姓賈。雁門樓煩人。幼而好學。博綜六經。尤善莊老。時道安法師建刹於太行恆山。師往歸之。一面盡敬。初聞安師講般若經。豁然開悟。因投簪受業。精思諷誦。以夜繼晝。安師常臨衆嘆曰。使道流東國者。其在遠乎。年二十四。大善講貫。太元六年。至潯陽。見廬山閒曠。可以息心。欲立精舍。以去水猶遠。舉杖扣地曰。若此可居。當使朽壤抽泉。言畢。清泉涌出。潯陽亢旱。師詣池側讀海龍王經。忽見神蛇從池而出。須臾大雨。歲竟有秋。因名龍泉精舍。時師同門慧永禪師。先居廬山西林。欲邀同止。而師學侶浸衆。西林隘不可處。永師乃謂刺史桓伊曰。遠公方富宏道。而貧道所棲隘不可處。是夕師夢山神告曰。此山足可棲神。願毋他往。忽於後夜大雨雷震。詰旦林麓廣闊。素沙布地。榎棗文梓。充布地上。不知所自至。伊大敬感。更爲師建刹。名其

殿曰神運。以在西林之東。故遂號東林。時太元十一年也。於是乃造西方三聖像。建齋立社。鑿池種蓮。於水上立十二葉蓮華。因波隨轉。分刻晝夜。以爲行道之節。主張蓮宗。蓮風大扇。既而四方息心緇侶。絕塵信士。聞風不期而至者。凡百二十三人。共結蓮社。六時行道。一意西歸。令劉遺民著發願文。勒之石。時王喬之等數人。復爲念佛三昧詩。以見志。師爲作序曰。夫稱三昧者何。思專想寂之謂也。思專則志一。而想寂則氣虛神朗。氣虛則智悟其照。神朗則無幽不徹。是二者。自然之玄符。會一而致用也。又諸三昧。其名甚衆。功高易進。念佛爲先。何者。窮玄極寂。尊號如來。體神合變。應不以方。故令入斯定者。昧然忘知。卽所緣以成鑒。鑒明則內照交映。而萬象生焉。非耳目之所暨。而見聞行焉。於是靈相湛一。清明自然。元音叩心。滯情融朗。非天下之至妙。孰能與於此哉。所以奉法諸賢。咸思一揆之契。感寸陰之將頽。懼來儲之未積。洗心法堂。整襟清向。夜分忘寢。夙興唯勤。庶夫貞詣之功。以通三乘之志。仰援超步拔茅之興。俯引弱進垂策其後。以此覽衆篇之揮翰。豈徒文詠而已哉。初是大

教流行。江東經藏未備。道法無聞。師遣弟子法淨。法領等。遠越葱嶺。曠歲來還。購諸梵本。並傳關中。先是此土未有泥洹常住之說。但言壽命長遠。師曰。佛是至極無變。無變之理。豈有窮耶。乃著法性論十四篇。以明泥洹常住旨之。什師見而嘆曰。邊方未見大經。便闡與理合。經言。末代東方有護法菩薩。欽哉仁者。善宏其道。曇摩流支入秦。師遣弟子曇邕。請於關中。出十誦律流傳晉國。及佛馱跋陀羅至。師卽請出禪數諸經。所有經律。出自廬山。幾至百卷。有行者來侍師。善驅蛇。蛇爲盡去。因號辟蛇行者。有一虎往來。時見行跡。未嘗傷人。人號遊山虎。師與社衆每遊憩上方峯頂。患去水遠。他日有虎跑其石。水爲之出。因名虎跑泉。師居東林三十餘年。跡不入俗。每若送客。常以虎溪爲界。領衆六時行道。未嘗一日暫輟。深信切願。專志西方。澄心繫念。三觀聖相而沈厚不言。後義熙十二年。七月晦夕。於般若臺。方從定起。見阿彌陀佛身滿虛空。圓光之中有諸化佛。觀音勢至左右侍立。又見水流光明分十四支。洄注上下。演說苦空無常無我之音。佛告曰。我以本願力故。來安慰汝。汝七日後當生

我國。又見社中先化者。佛馱耶舍。慧持。義熙八年先逝慧永。義熙十年先逝劉遺民。義熙六年先逝在佛

之側。前揖師曰。師志在先。何來之晚。既知時至。卽語弟子法淨。惠寶曰。吾始居此。十

一年中。三覩聖相。今復見之。當生淨土必矣。又曰。七日之期。斯爲漸矣。卽自製遺誠。

至期。端坐入寂。年八十三。卽義熙十二年八月六日也。遺命弟子。露骸於松林之下。

卽嶺爲墳。與土木同狀。弟子等不忍露骸。與潯陽太守阮侃。奉全身建塔於西嶺。謝

靈運。及宗炳。各立碑以銘遺德。所著有廬山集十卷。行世。唐宣宗大中二年。追諡辯

覺大師。昇元三年。追諡正覺。宋太宗太平興國三年。追諡圓悟大師。凝寂之塔。

悟開曰。晉太元中。遠祖始以淨土法門。建立蓮社。一時高僧名士多歸之。其思專

想寂四字。卽是念佛祕要。玄關。厥後諸賢往生。顯驗不一。嗚呼盛矣。萬世而下。不

可得而思議者歟。可謂釋迦再說西方。彌陀現身東土者也。厥功顧不偉歟。

蓮宗二祖

師諱善導。不詳其所出。人皆稱善導和尚。云是阿彌陀佛化身也。唐貞觀中。見西河

綽禪師。淨土九品道場。喜曰。此真入佛之精要。修餘行業。迂僻難成。唯此法門。速超生死。於是勤篤精苦。晝夜禮誦。旋至京師。激發四衆。每入室長跪唱佛。非力竭不休。出則演說淨土法門。三十餘年。未嘗睡眠。護持戒品。纖毫不犯。好食供衆。粗惡自奉。所有願施。用寫阿彌陀經。十萬餘卷。畫淨土變相三百餘壁。修營塔寺。燃燈續明。三衣瓶鉢。不使人持。行不共衆。恐談世事。道俗從其化者甚衆。有誦彌陀經。十萬至五十萬遍者。有日課佛名。一萬至十萬者。其間得三昧。生淨土者。不可紀述。或問念佛生淨土耶。師曰。如汝所念。遂汝所願。其勸世偈曰。漸漸雞皮鶴髮。看看行步龍鐘。假饒金玉滿堂。豈免衰殘老病。任汝千般快樂。無常終是到來。唯有徑路修行。但念阿彌陀佛。或問。何故不令人作觀。直遣專稱名號耶。答。衆生障重。境細心粗。識颺神飛。觀難成就。是以大聖悲憐。直勸專稱名號。正由稱名易故。相續卽生。若能念念相續。畢命爲期者。十卽十生。百卽百生。何以故。無外雜緣得正念故。與佛本願相應故。不違教故。順佛語故。若捨專念。修雜業者。百中希得一二。千中希得三四。何以故。雜緣

亂動失正念故。與佛本願不相應故。與教相違故。不順佛語故。繫念不相續故。心不相續報佛恩故。雖作行業。常與名利相應故。樂近雜緣。自障障他往生正行故。比見諸方道俗。解行不同。專雜有異。但使專意作者。十卽十生。修雜不至心者。千中無一。普願一切人等。善自思惟。行住坐臥。必須勵心克己。晝夜莫廢。畢命爲期。前念命終。後念卽生。長時永劫。廣受法樂。乃至成佛。豈不快哉。又作臨終正念文曰。凡人臨命終時。欲得往生淨土者。須先準備。不得怕死。常念此身多有衆苦。不淨惡業種種交纏。若得捨此穢身。超生淨土。受無量快樂。見佛聞法。離苦解脫。乃是稱意之事。如脫臭敝之衣。得換珍御之服。放下身心。莫生貪著。纔有病患。莫論輕重。便念無常。一心待死。須囑家人。及問候人。凡來我前。但爲我念佛。不得說眼前閒雜之話。家中長短之事。亦不須輒語安慰。祝願安樂。此皆虛華無益之語。若病重將終。親屬不得垂淚哭泣。及發嗟嘆懊惱之聲。惑亂心神。失其正念。但得同聲念佛。助其往生。若得明曉淨土之人。頻來策勵。極爲大幸。若依此者。決定往生無疑矣。多見世人。平時念佛。發

願求生。甚是勤拳。及至臨終。卻又怕死。都不說著往生之事。死門事大。必須自家著力始得。一念差錯。歷劫受苦。誰人相代。思之思之。師自念佛一聲。有一光明從其口出。十至於百。光亦如之。忽一日。謂人曰。此身可厭。吾將西歸。乃登寺前柳樹。向西祝曰。願佛接我。菩薩助我。令我不失正念。得生安養。祝願已。卽投身而逝。唐高宗皇帝知其神異。賜寺額曰光明云。

悟開曰。廬山而後二百年。出善導和尚。大揚法化。丕振蓮宗。其曰。如汝所念。遂汝所願。又言。專念者。十卽十生。百卽百生。修雜業者。百中希得一二。千中希得三四。其得失關頭。唯在與佛本願相應。不相應處。末後臨終正念文。剴切指陳。可謂慈心太切矣。學者當識取正派源頭。

蓮宗三祖

師諱承遠。不詳其所出。始學於成都唐公。次資川誥公。至荊州進學於玉泉眞公。公令居衡山設教。人從其化者萬計。始居山西南巖石之下。人遺食則食。不遺者食土。

泥草木而已。其取衣類是。南極海裔。北自幽都。來求厥道。值之巖谷。羸形垢面。躬負薪樵。以疑僕從而媠之。乃師也。凡化人。立中道而教之。權俾得以疾至。示專念法門。書塗巷。刻溪谷。不勤誘掖。人皆負布帛。斬木石。委之巖戶。師不拒不營。祠宇既具。賜額曰。彌陀寺。營造之餘。悉施與餓疾者。先是有沙門法照者。居廬山。由正定中。趨安樂國。見蒙惡衣侍佛者。佛告曰。此衡山承遠也。出而求之。肖焉。乃從之學。傳教天下。嗣照於代宗時爲國師。見柳子厚集南岳碑乃言其師有至德。度其道不可徵。天子南嚮而禮焉。賜其居曰。般舟道場。唐貞元十八年。七月十九日。示寂於寺。年九十一。柳宗元製碑立石於寺門之右。

悟開日。羸形垢面。尙在娑婆。而正定中人。已見侍佛側矣。苟非潛修密證之功。曷臻乎此。吁。真不愧爲蓮宗祖師。上來三大祖師。觀其自行之精嚴。利生之廣博。萬代而下。猶能感發人之信心。猗歟懿哉。

師諱法照。不詳其所出。大歷二年。居衡州雲峯寺。慈忍戒定。爲時所宗。一日於僧堂粥鉢中。覩五色祥雲。雲內現山寺。寺東北有山。山下有澗。澗北有石門。門內復有一寺。榜曰大聖竹林寺。他日復於鉢中。見雲中數寺。池臺樓觀。萬菩薩衆。雜處其中。以所見問知識。有一僧曰。聖神變化。不可情測。若論山川勢面。乃五臺也。四年。師於郡之湖東寺。開五會念佛道場。感祥雲彌覆。雲中現樓閣。阿彌陀佛。及二菩薩。身滿虛空。衡州舉郭。咸焚香瞻禮。良久方滅。師復遇一老人。謂曰。汝曾發願往金色世界禮觀大聖。今何輒止。言訖不見。師遂與同志數人。遠詣五台。五年四月六日。至五台縣佛光寺。其夕四更。遙見異光照身。卽之行五十里。得一山。山下有澗。澗北有一石門。見二童子。自稱善財難陀。引至一寺。榜曰大聖竹林寺。如鉢中所見。金地寶樹。以爲莊嚴。入寺登講堂。見文殊在西。普賢在東。坐師子座。萬衆圍繞。而爲說法。師作禮問曰。末代凡夫。去聖時遠。知識隘劣。障垢尤深。佛性無由顯現。佛法浩瀚。未審修何法門。最爲其要。文殊告曰。汝今念佛。今正是時。諸修行門。無過念佛。供養三寶。福慧雙

修此之二門。最爲徑要。我於過去劫中。因觀佛故。因念佛故。因供養故。得一切種智。是故一切諸法。般若波羅蜜。甚深禪定。乃至諸佛。皆從念佛而生。故知念佛。諸法之王。師又問。當云何念。文殊言。此世界西。有阿彌陀佛。彼佛願力。不可思議。汝當繼念。令無間斷。命終決定往生。永不退轉。語已。二大聖同舒金臂。摩師頂曰。汝以念佛故。不久證無上正等菩提。若善男女等。願疾成佛者。無過念佛。則能速證無上菩提。師歡喜作禮辭而退。二童子送出寺門。舉頭忽失所在。乃立石標記其處。至四月十三日。師與五十餘僧。同往金剛窟。虔心禮三十五佛名。師禮纔十徧。忽見其處廣大嚴淨。琉璃宮殿。文殊普賢俱在一處。復獨詣金剛窟所。願見大聖。以身撲地。見梵僧佛陀波利。引入一院。額曰。金剛般若寺。異寶莊嚴。光明閃爍。師雖歷覩靈異。而未語人。也是年臘月。於華嚴寺。入念佛道場。憶二大士。記我往生。乃絕粒要期。誓生淨土。至七月初夜。正念佛時。見一梵僧入謂曰。汝所見臺山境界。胡不傳示世人。言畢不見。師心異之。翌日又見梵僧語如前。師曰。非敢祕聖道。恐生疑謗耳。僧曰。大聖文殊。現

在此山尙招人謗。汝何惜焉。但以所見境界。普告衆生。使見聞者。發菩提心。作毒鼓緣耳。師卽遂憶所見。錄以傳世。明年江東沙門慧從。與華嚴寺諸僧。隨師至金剛窟。及立石標記處。瞻仰舊跡。大衆悲喜未已。忽聞鐘聲。其音雅亮。節解分明。衆愈驚異。知師所見不虛。因書於屋壁。願見聞者。共發勝心。後往竹林寺。於題額處。建寺一區。仍號竹林焉。師於是篤志念佛。日夜無曠。忽見佛陀波利。謂曰。汝華已就。後三年華開矣。臘月一日。謂衆曰。吾行矣。端坐而逝。師嘗於并州五會念佛。感代宗皇帝宮中聞念佛聲。遣使追尋。乃見師勸化之盛。遂召入京。封國師。教宮人念佛。亦及五會。號五會法師。

悟開曰。以文殊金口。宣揚念佛法門。四祖凡身。親歷五臺聖境。誠浩劫中。難遇難逢。莫大因緣也。揆厥本旨。無非大菩薩入五濁惡世。化導羣迷。令早覺悟。如教修持。超脫苦輪而已。復何疑哉。

蓮宗五祖

師諱少康。姓周。縉雲仙都山人。母羅氏。夢遊鼎湖峯。有玉女以青蓮華授之。曰。此華吉祥。當生貴子。及生。青光滿室。作芙蓉香。七歲未語。相者奇之。一日。母攜入靈山寺禮佛。母問識否。忽發言曰。釋迦牟尼佛。父母驚異。知其宿具善根。遂捨之出家。年十五。能通法華楞嚴等五部義。尋往會稽嘉祥。學究律部。復往上元隆興聽講。唐貞元初。至洛陽白馬寺。見殿中文字放光。探之。則善導和尚西方化導文也。師祝曰。若於淨土有緣。當使此文再放光明。言已。光復閃爍。光中隱隱有化菩薩。師曰。劫石可磨。我願無易矣。遂至長安光明寺。善導和尚影堂瞻禮。忽見真像升空。謂曰。汝依我教。廣化有情。他日功成。必生安養。師南至江陵。遇一僧。謂曰。汝欲化人。當往新定。緣在於彼。言訖不見。乃適新定。乞錢誘小兒念佛。念佛一聲。卽與一錢。如是年餘。凡男女少長。見師皆稱阿彌陀佛。念佛之聲。盈滿道路。遂於烏龍山。建淨土道場。築壇三級。每遇齋日。善信畢集。師乃升座。高聲唱佛。衆共和之。師唱佛一聲。衆見一佛從其口出。十聲則有十佛。如貫珠焉。師謂衆曰。汝見佛者。必得往生。衆聞欣慰。念佛益勵。時

衆數千。有不見者。悲感自責。因倍精進。後二十一年十月三日。囑道俗曰。大衆。當於淨土起欣樂心。於閻浮提起厭離心。汝等此時。見我光者。眞我弟子。言已。遂放異光數道。寂然而逝。郡人奉全身建塔於臺子巖。號臺巖法師。

悟開曰。念佛一聲。口出一佛。此菩薩境界。非造作所能者。學者當觀其化導之權巧。隨機施設。爲天下後世法。方見得祖師本意。如佛禦象。慈善根力。自然而有獅子出現。

蓮宗六祖

師諱延壽。字冲元。杭州錢塘王氏子。自少誦法華經。錢文穆王時。知稅務。多用官錢買放生。罪當死。引起市曹王使人瞞之。面色不變。文穆王因釋之。遂投四明翠巖禪師出家。後參天台韶國師。言下大徹。旋受法。爲法眼嫡孫。嘗行法華懺二十一日。備極精懇。夢見觀音菩薩以甘露灌口。因是得無礙辯才。復於禪觀中。見普賢蓮華忽然在手。因思宿願未決。故登智者巖。作二圖。一曰一心禪定。一曰萬善莊嚴淨土。

冥心精禱。七拈皆得淨土圖。於是一意專修淨業。日課佛名十萬。終身期生安養。作神棲安養賦以見志。其文云。彌陀寶刹。安養嘉名。處報土而極樂。於十方而最清。二八觀門。修定意而冥往。四十八願。運散心而化生。爾乃畢世受持。一生皈命。仙人乘雲而聽法。空界作唄而讚詠。紫金臺上。身登而本願非虛。白玉毫中。神化而一心自慶。詳夫廣長舌讚。十刹同宣。但標心而盡契。非率意而虛傳。地軸迴轉。天華散前。一念華開。見佛而皆登妙果。千重光照。證法而盡廁先賢。考古推今。往生非一。運來而天樂盈空。時至而異香滿室。一真境內。現相而雖仗佛威。七寶池中。覩境而皆從心出。故知聖旨難量。感應猶長。變凡成聖而頃刻。卽迷爲悟而昭彰。探出仙書。真是長生之術。指歸淨刹。永居不死之鄉。更有出世高人。處塵大士。焚身然臂而發行。掛胃捧心而立軌。仙樂來迎而弗從。天童請命而不喜。或火烈山頂。光明境裏。絕聞惡趣之名。永拋胎獄之鄙。眼開舌固而立驗。牛觸鷄鶻而忽止。處鐵城而拒王勅。須徇丹心。坐蓮臺而賴佛恩。難拋至理。其或誹謗三寶。破壞律儀。逼風刀解體之際。當業鏡

照形之時。忽遇知識。現不思議。劍林變七重之行樹。火車化八德之蓮池。地獄消沈。湛爾而怖心全息。天華飛引。俄然而化佛迎之。慧眼明心。香鑪墮手。應讖而蓮華不萎。得記而寶林非久。奇哉佛力難思。古今未有。又作四料簡。一曰有禪無淨土。十人九蹉路。陰境若現前。瞥爾隨他去。二曰無禪有淨土。萬修萬人去。但得見彌陀。何愁不開悟。三曰有禪有淨土。猶如戴角虎。現世爲人師。來生作佛祖。四曰無禪無淨土。鐵牀并銅柱。萬劫與千生。沒箇人依怙。建隆二年。忠懿王請住慧日永明寺。賜號智覺禪師。日行一百八事。夜往別峯行道念佛。旁人時聞螺貝天樂之音。忠懿王歎曰。自古求西方者。未有如此精誠專切。乃立西方香嚴殿以成其志。所著宗鏡錄百卷。會融諸法。同入心宗。又著萬善同歸集。三卷發明空有性相之旨。提策真修。歸之中道。節錄數條。明乎淨業。一問。論云行道念佛。與坐念佛。功德如何。答。譬如逆水張帆。猶云得往。更加張帆順水。速疾可知。坐念一日。尚乃八十億劫罪消。行念功德。豈知其量。故偈云。行道五百徧。念佛一千聲。事業常如此。西方佛自成。二問。經云觀身實

相。觀佛亦然。一念不生。天真頓朗。何得唱他佛號。廣誦餘經。高下輪迴。前後生滅。既妨禪定。但徇音聲。水動珠昏。寧當冥合。答。夫聲爲衆義之府。言皆解脫之門。一切法趣聲。聲爲法界。經云。一一諸法中。皆含一切法。故知一言音中。包羅無外。十界具足。三諦理圓。何得非此重彼。離相求真。不窮動靜之源。遂致語默之失。故經云。一念初起。無有初相。是真護念。未必息念消聲。方冥實相。是以莊嚴門內。萬行無虧。真如海中。一毫不訛。且如課念佛號。教有明文。唱一聲而罪滅塵沙。具十念而神棲淨土。拯危拔難。殄障消怨。非但一期暫拔苦津。託此因緣。終投覺海。寶王論云。浴大海者。已用於百川。念佛名者。必成於三昧。亦猶清珠下於濁水。濁水不得不清。佛號投於亂心。亂心不得不佛。既契之後。心佛雙亡。雙照。雙亡。定也。雙照。慧也。定慧既均。亦何心而不佛。何佛而不心。心佛既然。則萬境萬緣。無非三昧也。誰復患之於起。心動念高。聲稱佛哉。三問。觸目菩提。舉足皆道。何須別立事相道場。役念勞形。豈諸妙旨。答道。場有二。一理道場。二事道場。理道場者。周徧刹塵。事道場者。淨地嚴飾。卽事明理。須

假莊嚴。從俗入真。唯憑建立。爲皈敬之本。作策發之門。覩相嚴心。自他兼利。上都儀云。夫皈命三寶者。要指方立相。住心取境。不明無相離念也。佛懸知凡夫。繫心尙乃不得。况離相耶。如無術通人。居空造舍也。故直須一心皈命。盡報精修。坐臥之間。常面西向。當行道禮敬之際。念佛發願之時。懇苦翹勤。無諸異念。如就刑戮。若在狴牢。怨賊所迫。水火所逼。一心求救。願脫苦輪。速證無生。廣度含識。紹隆三寶。誓報四恩。如斯至誠。方不虛棄。如或言行不稱。信願輕微。無念念相續之心。有數數間斷之意。恃其懈怠。臨終望生。但爲業障所遮。恐難值其善友。風火逼迫。正念不成。何以故。如今是因。臨終是果。應須因實。果則不虛。喻聲和則響順。形直則影端也。四問。卽心是佛。何須外求。若認他塵。自法卽隱。答。諸佛法門。亦不一向。皆有自力他力。自相共相。十立門之該攝。六相義之融通。隨緣似分。約性常合。從心現境。境卽是心。攝所歸能。他卽是自。經云。非內非外。而內而外。而內故。諸佛解脫於心。行中求。而外故。諸佛護念。云何不信外益耶。若禮拜則屈伏無明。深投覺地。致敬之極。如樹倒山崩。業報差

別經云。禮佛一拜。從其膝下。至金剛際。一塵。一轉輪王位。獲十種功德也。三藏勒那云。發智清淨禮者。良由達佛境界。慧心明利。了知法界。本無有礙。由我無始順於凡俗。非有有想。非礙礙想。今達自心。虛通無礙。故行禮佛。隨心現量。禮於一佛。卽禮一切佛。禮一切佛。卽是禮一佛。以佛法身體用融通。故禮一拜。徧通法界。如是香花種種供養。例同於此。六道四生。同作佛想。文殊云。心不生滅。故敬禮無所觀。內行平等。外順修敬。內外冥合。名平等禮。略引祖教。理事分明。不可滅佛意。而毀金文。據徧見而傷圓旨。五問。心外無佛。佛不去來。何有見佛及來迎之事。答。唯心念佛。以唯心觀。徧該萬法。既了境卽心。了心卽佛。故隨所念。無非佛矣。般舟三昧經云。如人夢見七寶。親屬歡喜。覺已追念。不知在何處。如是念佛。此喻唯心所作。卽有而空。故無來去。感應道交。唯心自見。如造罪衆生。感地獄相。皆是唯識罪人惡業心現。並無心外實有銅狗鐵蛇等事。世間一切事法。亦復如是。然遮那佛土。匪局東西。若正解了然。習累俱殄。理量雙備。親證無生。既歷聖階。位居不退。卽不厭生死苦。六道化羣生。如或

信心初具。忍力未圓。欲拯沈淪。實難俱濟。無船救溺。弱翅高飛。臥沈疴而欲離良醫。處襁褓而擬拋慈母。久遭沈墜。必死無疑。但得陷己之虞。未有利他之分。故智論云。譬如嬰兒。若不近父母。或墮坑落井。水火等難。渴乳而死。須常近父母。養育長大。方能紹繼家業。初心菩薩。多願生淨土。親近諸佛。增長法身。方能繼佛家業。十方運濟。有斯益故。多願往生。又按諸經云。生安養者。緣強地勝。福備壽長。蓮華化生。佛親迎接。便登菩薩之位。頓生如來之家。永處跋致之門。盡受菩提之記。身具光明妙相。跡踐寶樹香臺。獻供十方。寧神三昧。觸耳常聞大乘之法。差肩皆隣補處之人。念念虛玄。心心靜慮。煩惱燄滅。愛欲泉枯。尚無惡道之名。豈有輪迴之事。安國鈔云。所言極樂者。有二十四種樂。羣疑論云。西方淨土有三十種益。文繁不引故釋迦本師殷勤勸往。十方諸佛。廣舌證明。豈可不足信歟。六問。龐居士云。事上說佛國。此去十萬億。大海渺無邊。動卽黑風起。往者雖千萬。達者無一二。忽遇本來人。不在因緣裏。云何通會而證往生答。若提宗考本。尚不說有佛有土。豈言達與不達乎。所以天真自具。不涉

因緣。匪動絲毫。常冥真體。若約事論。故非一等。九品往生。上下俱達。或遊化國。見佛應身。或生報土。覩佛真體。或一夕而便登上地。或經劫而方證小乘。或利鈍根。或定散意。或道悟遲速。根機不同。或華開早晚。時限有異。今古具載。凡聖俱生。行相昭然。明證自驗。故佛親記文殊。當生阿彌陀佛土。位登初地。無量壽經云。彌勒菩薩問佛。未知此界。有幾許不退菩薩。得生彼國。佛言。此娑婆世界。有六十七億。不退菩薩。皆得往生。不退菩薩。尚願往生。况凡夫乎。佛梵音聲。豈虛誑哉。七問。但見性悟道。便超生死。何用繫念彼佛。求生他土。答。真修行人。應自審察。如人飲水。冷暖自知。今存龜鑑。以破多惑。諸仁者。當觀自己行解。見性悟道。受如來記。紹祖師位。能如馬鳴龍樹。否。得無礙辯才。證法華三昧。能如天台智者。否。宗說皆通。行解兼修。能如忠國師。否。此諸大士。皆明垂言教。深勸往生。蓋是自利利他。豈肯誤人自誤。况大雄讚歎。金口叮嚀。希從昔賢。恭稟佛敕。定不謬誤也。如往生傳所載。古今高士事蹟。顯著非一。宜勤觀覽。以自照知。又當自度。臨終之時。生死去住。定得自在。否。自無始來。惡業重障。

定不現前否。此一報身。定脫輪迴否。三途惡道異類中行。出沒自由。定無苦惱否。天上人間。十方世界。隨意寄託。定無滯礙否。若也了了自信得及。何善如之。若其未也。莫以一時貢高。卻致永劫沈淪。自失善利。將復尤誰。嗚呼哀哉。何嗟及矣。何乃愛河浪底。沈溺無憂。火宅燄中。焚燒不懼。密織癡網。淺智之刃。莫能揮。深種疑根。泛信之力焉。能拔。遂卽甘心伏意。幸禍樂災。卻非清淨之邦。顧戀恐畏之世。焦蛾爛繭。自處餘殃。籠鳥鼎魚。翻稱快樂。故知佛力不如業力。邪因難趣正因。且未脫業身。終縈三障。既不愛蓮臺化質。應須向胎藏稟形。若受肉身。全身是苦。既沈三界。寧免輪迴。今於八苦之中。略標生死二苦。一生苦者。攬精血爲體。處生熟藏中。四十二變而成幻質。上壓穢食。下熏臭坑。飲冷若冰河。吞熟如鑪炭。宛轉迷悶。不可具言。及至生時。衆苦無量。觸手墮地。如活剝牛皮。逼窄艱難。似生脫龜殼。銜怨抱恨。擬害母身。纔觸熱風。苦緣頓忘。嬰兒痴騃。水火橫亡。脫得成人。有營身種。業田既熟。愛水頻滋。無明發生。苦芽增長。膠粘七識。籠罩九居。如旋火輪。循環莫已。二死者。風刀解身。火大燒

體聲虛內顫。魄悸魂驚。極苦併生。惡業頓現。千愁鬱悒。萬怖惺惶。乃至命謝氣終。寂然孤逝。幽途黯黯。冥路茫茫。與昔怨讐。皎然相對。號天扣地。求脫無門。隨業淺深。而歷諸趣。或倒生地獄。或陰受鬼形。忍饑渴而長劫號咷。受罪苦而徧身焦爛。未脫二十五有。善惡之業靡亡。追身受報。未曾遺失。生死海闊。業道難窮。聲聞尙昧。出胎菩薩猶昏。隔陰。況具縛生死。底下凡夫。寧不被生苦所羈。死魔所繫。故目連所問經云。佛告目連。譬如萬川長注。有浮草木。前不顧後。後不顧前。都會大海。世間亦爾。雖有豪貴富樂自在。悉不得免生老病死。祇由不信佛經。後世爲人。更深困劇。不能得生千佛國土。是故我說無量壽佛國土。易往易取。而人不能修行往生。反事九十六種邪道。我說是人名無眼人。名無耳人。又大集月藏經云。我末法時中。億億衆生起行修道。未有一得者。當今末法。現是五濁惡世。唯有淨土一門。可通入路。當知自行難圓。他力易就。如劣士附輪王之勢。飛遊四天。凡質託仙藥之功。昇騰三島。實爲易行之道。疾得相應。慈旨叮嚀。須銘肌骨。居永明十五年。弟子千七百人。常與衆受菩薩

戒。施食放生。悉皆回向淨土。開寶八年二月二十六日。晨起焚香告衆。跏坐而化。年七十二。後有僧來自臨川。經年繞其塔。人問故。曰。我病入冥。見殿左供一僧像。王勤禮拜。因詢之。曰。此杭州永明壽禪師也。已經往生西方上品矣。王重其德。故禮敬耳。崇寧中。追諡宗照禪師。本朝世宗憲皇帝。加封妙圓正修智覺禪師。

悟開曰。修道之士。頗具好心。奈根器狹劣。動止多偏。祖愍此輩。故不憚煩勞。諄諄化導。坐斷一切狂慧口舌。解散一切義學藩籬。精修萬行。莊嚴淨土。皆過量大人之作略。人豈得擬議者哉。

宗蓮七祖

師諱省常。字造微。姓顏。錢塘人。七歲出家。十七進具。宋淳化中。住南昭慶。慕廬山之風。謀結蓮社。因刻無量壽佛像。刺血書華嚴淨行品。於是易蓮社爲淨行社。一時公卿大夫之預會者。百二十人。皆稱淨行弟子。王文正公旦爲之首。比丘千人焉。翰林蘇易簡。作淨行品序。至謂予當布髮以承其足。剡身以請其法。猶尙不辭。況陋文淺。

學而有惜哉。然師才辯勝人。律嚴超常。領衆行道。日夜精勤。畢此一形。期生安養。天禧四年正月十二日。於寺端坐念佛。有頃。厲聲唱曰。佛來也。泊然而化。衆見地色皆金。移時方隱。年六十二。弟子奉全身建塔於烏窠禪師之側。號圓淨法師。

悟開曰。自二祖振興以來。唐代連綿昌盛。五季以來。其道稍晦。永明禪師以宗門龍象。專尊淨業。常祖以嚴護木叉。主張蓮社。於是先後中興。隆隆千古。修淨業者。信願行如鼎三足。缺一不可。無如年代愈晚。根器愈薄。雖有信願。而行門恆虧。蓮社易名淨行社。良有深旨。

蓮宗八祖

師諱祿宏。字佛慧。號蓮池。古杭仁和人。俗姓沈氏。世爲名族。父德鑑。號明齋先生。母周氏。師生而穎異。年十七。補諸生。以學行稱。忽悟生死事大。自此棲心淨土。戒殺生。祭必素。娶婦張氏。生一子殤。頃婦亦亡。母強之。續納湯氏。然師意非欲也。年三十一。父母俱喪。因泣曰。罔極之恩。正吾報答時矣。乃作七筆勾詞。棄家投西山性天和尚。

祝髮。乞昭慶玉律師受具。於是杖策遊方。徧參知識。過東昌忽有悟。隆慶五年。乞食雲棲。見山水幽絕。結茅居焉。山故多虎。爲放瑜伽餓口。虎不爲患。時歲亢旱。居民乞禱雨。師唯唱佛名。雨隨注。衆悅。相與庀材造屋。衲子日歸。遂成叢席。所設門庭。專修淨業。外嚴淨毗尼。尊崇講誦。明因果。識罪福。整飭清規。眞修實行。凡所謂欺世盜名者。無可施其伎倆。世皆謂祖祇宏淨土。而不知末法中之普光明藏也。嘗著淨土疑辯一篇。誠醒狂禪之痛策也。文云。或問淨土之說。蓋表法耳。智人宜直悟禪宗。而今只管讚說淨土。將無執著事相。不明理性。答。歸元性無二。方便有多門。曉得此意。禪宗淨土。殊途同歸。子之所疑。當下冰釋。昔人於此。遞互闡揚。不一而足。如中峯大師道。禪者淨土之禪。淨土者禪之淨土。而修之者。必貴一門深入。此數語尤萬世不易之定論也。故大勢至菩薩得念佛三昧。而曰以念佛心。入無生忍。普賢菩薩入華嚴不思議解脫。而曰願命終時。生安樂刹。是二大士。一侍娑婆教主。一侍安養導師。宜應各立門戶。而乃和會圓融。兩不相礙。此皆人所常聞習知。那得尙執偏見。且爾云

淨土表法者。豈不以淨心卽是淨土。豈復更有七寶世界。則亦將謂善心卽是天堂。豈復更有夜摩忉利。惡心卽是地獄。豈復更有刀劍鑊湯。愚癡卽是畜生。豈復更有披毛戴角等耶。又爾喜談理性。厭說事相。都緣要顯我是高流。怕人說我不通理性。噫。若真是理性洞明。便知事外無理。相外無性。本自交徹。何須定要捨事求理。離相覓性。况土分四種。佛有三身。汝謂只有寂光土。更無實報莊嚴等土乎哉。若一味說無相話以爲高。則資性稍利者。看得兩本經論。記得幾則公案。卽便能之。何足爲難。且汝旣了徹自心。隨處淨土。吾試問汝。還肯卽廁溷中作住止否。還肯就犬豕牛馬同槽而飲噉否。還肯洗摩飼哺伽摩羅疾。膿血屎尿諸惡疾人。積年累月否。於此數者。歡喜安隱。略不介意。許汝說高山平地。總西方。其或外爲忍勉。內起疑嫌。則是淨穢之境仍分。憎愛之情尙在。而乃開口高談大聖人。過量境界。撥無佛國。蔑視往生。可謂欺天誑人。甘心自昧。苦哉苦哉。又汝若有大力量。有大誓願。願於生死海中。頭出頭沒。行菩薩行。更無畏却。則淨土之生。吾不汝強。如或慮此土境風浩大。作主不

得。慮諸佛出世難值。修學無由。慮忍力未固。不能於三界險處。度脫衆生。慮盡此報身。未能永斷生死。不受後有。慮後有既在。捨身受身。前路茫茫。未知攸往。則棄淨土而不生。其失非細。淨土法門。似淺而深。似近而遠。似難而易。似易而難。他日汝當自知。汝今參禪念佛。不妨隨便一門深入。但忌認鑰作金。得少爲足。便以管窺小解。恣意妄談。非詆淨土。喻如癡狂之子。罵斥父母。父母慈憐。雖不加責。其如天理之不容。王法之必戮何。彼妄談者。報亦如是。可懼也夫。可悲也夫。深嗟吾人。生死關頭。最難明白。古云。聲聞尙昧出胎。菩薩猶昏隔陰。予初疑聲聞已具六通。菩薩雙修定慧。何由昏昧。均未能免。及考之自己。稽之他人。昨宵之事。平旦忽爾茫然。况隔陰乎。乍遷一房。夜起不知南北。况出胎乎。彼諸賢聖之昏昧。蓋暫昏而卽明。俄昧而漸覺者也。而我等凡夫。則終於昏昧。而不自知也。捨身受身。利害有如此者。爲今之計。直須堅凝正心。毋使刹那失照。而復懇苦虔誠。求生淨土。生淨土則昏昧不足慮矣。既放其心。復撥淨土。危乎傷哉。今人多好說參悟。好說了生死。不知在此土了悟甚難。謂之

豎超三界。斯陀含猶一往一來。况凡夫乎。此土衆生。多是先生西方。然後了悟。生西方一門。謂之橫超三界。萬無一失。如上所說。誠可謂剖心之語。徹骨之談。不但令淺學之人信而有勇。又可使深悟之士。事理圓彰。所著雲棲法彙一書。真度世之寶筏。法門之柱石。其彌陀疏鈔。闡發事理一心。至爲淵奧。自蓮宗建立以來。未曾有也。嘉言偉績。備載全書。譬夫龍宮之寶。難以指陳。但好學之士。所宜捧讀而領會者矣。蓮祖開法四十餘年。道播寰宇。從其化者甚衆。萬歷四十三年。六月杪。入城別諸故舊。七月朔晚。入堂曰。明日吾行矣。次夕入丈室。示微疾。瞑目坐。城中諸弟子畢至。復開目曰。大衆老實念佛。莫捏怪。莫壞我規矩。向西稱佛名而逝。祖生於嘉靖十四年正月二十二日。示寂於萬曆四十三年七月初二日。僧臘五十。世壽八十有一。得度弟子廣孝等。并及門受戒者。不下數千計。縉紳士君子及門者。亦以千計。本年八月二十三日。入塔於寶刀隴之陽。卽五雲之麓也。

悟開曰。去常祖五百五十年。而雲棲出。方雲棲之未出也。法道式微。蓮宗寥落。適

當龍池出世。而直指之宗復昌。念佛法門。則振起雲棲。是時天下佛法。爲之大興。然其策厲清規。嚴明梵行。以救夫末世疲弊之習。而使靈山一會光明再顯者。於蓮祖爲尤長也。迨今二百餘年。而天下學道者。念佛居多。且必景仰雲棲。是知蓮祖之遺風猶在焉。

蓮宗九祖

師諱智旭。字藕益。號西有。姓鍾。吳縣人。父持白衣大悲呪。夢大士送子而生。師少以聖學自任。著書闢佛。凡數千言。及閱雲棲竹窗隨筆。乃焚所著論。年二十。讀地藏本願經。發出世志。日誦佛名。天啓元年。年二十四。聽一法師講經。疑情忽發。用心參究。已而豁然。尋掩關於吳江。遇疾且殆。始一意求生淨土。疾少閒。結壇持往生呪七日。說偈曰。稽首無量壽。拔業障根本。觀世音勢至。海衆菩薩僧。我迷本智光。妄墮輪迴苦。曠劫不暫停。無救無歸趣。劣得此人身。仍遭劫濁亂。雖復預僧倫。未入法流水。目擊法輪壞。欲挽力未能。良由無始世。不植勝善根。今以決定心。求生極樂土。乘我本

誓船。廣度沈淪衆。我若不往生。不能滿所願。是故於娑婆。畢定應舍離。猶如被溺人。先求疾到岸。乃以方便力。悉拯暴流人。我以至誠心。深心回向心。然臂香三炷。結一七淨壇。專持往生呪。惟除食睡時。以此功德力。求決生安養。我若退初心。不向西方者。甯卽墮泥犁。令疾生改悔。誓不戀人天。及以無爲處。仰願大威神。力無畏不共。三寶無邊德。加被智旭等。折伏使不退。攝受令增長。其後歷住溫陵。漳州。石城。旻溪。長水。新安。廣宏。台教。而歸老於靈峯。時諸方禪者。多以淨土爲權教。遇念佛人。必令參究誰字。師獨謂持名一法。卽是圓頓心宗。有卓左車者。嘗設問言。如何是念佛門中向上一路。如何得離四句絕百非。如何是念佛人最後極則。如何是淆譌處腦後一鎚。冀和尚將向來自性彌陀。唯心淨土等語。撇向一邊。親見如來境界。快說一番。震動大千世界。師答言。向上一著。非禪非淨。卽禪卽淨。才言參究。已是曲爲下根。果大丈夫。自應諦信是心作佛。是心是佛。設一念與佛有隔。不名念佛三昧。若念念與佛無間。何勞更問阿誰。淨土極則事。無念外之佛。爲念所念。無佛外之念。能念於佛。正

下手時。便不落四句百非。通身拶入。但見阿彌陀佛一毛孔光。卽見十方無量諸佛。但生西方極樂一佛國土。卽生十方諸佛淨土。此是向上一路。若捨現前彌陀。別言自性彌陀。捨西方淨土。別言唯心淨土。此是淆譌公案。經云三賢十聖住果報。唯佛一人居淨土。此是腦後一鎚。但能深信此門。依信起願。依願起行。則念念流出無量如來。徧坐十方微塵國土。轉大法輪。照古照今。非爲分外。何止震動大千世界。又嘗示人云。夫念佛法門。別無奇特。只是深信力行爲要耳。佛云。若人專念阿彌陀。是名無上深妙禪。天台云。四種三昧。同名念佛。念佛三昧。名爲三昧中王。雲棲云。一句阿彌陀佛。該羅八教。圓攝五宗。可惜如今人。將念佛看做淺近勾當。謂愚夫愚婦工夫。所以信既不深。行亦不力。終日悠悠。淨功莫尅。或有巧設方便。欲深明此念佛三昧者。動以參究誰字爲向上。殊不知一念現前之心。本是離句絕非。不消作意離絕。卽現前一句所念之佛。亦本超情離見。何勞說妙說玄。只貴信得及。守得穩。直下念去。或晝夜十萬。或五萬三萬。以決定不缺爲準。畢此一生。誓無改變。而不得往生者。三

世諸佛便爲誑語。一得往生。則永無退轉。種種法門。悉得現前。切忌今日張三。明日李四。遇著教下人。又思尋章摘句。遇著宗門人。又思參究問答。遇著持律人。又思搭衣用鉢。此則頭頭不了。帳帳不清。豈知念得阿彌陀佛熟。三藏十二部極則教理。都在裏許。千七百公案。向上機關。亦在裏許。三千威儀。八萬細行。三聚淨戒。亦在裏許。眞能念佛。放下身心世界。卽大布施。眞能念佛。不復起貪瞋癡。卽大持戒。眞能念佛。不計是非人我。卽大忍辱。眞能念佛。不稍間斷夾雜。卽大精進。眞能念佛。不妄想馳逐。卽大禪定。眞能念佛。不爲他岐所惑。卽大智慧。試自簡點。若於身心世界。猶未放下。貪瞋癡念。猶自現在。是非人我。猶自挂懷。間斷夾雜。猶未除盡。妄想馳逐。猶未永滅。種種他岐。猶能惑志。便不名爲眞念佛也。要到一心不亂境界。亦無他術。最初下手。須用數珠。記得分明。刻定課程。決定無缺。久久純熟。不念自念。然後記數亦得。不記數亦得。若初心便要說好看話。要不著相。要學圓融自在。總是信不深。行不力。饒你講得十二分教。下得千七百公案。皆是生死岸邊事。臨命終時。決然用不著。又云。

若欲速脫輪迴之苦。莫如持名念佛。求生極樂世界。若欲決定得生極樂世界。又莫如以信爲前導。願爲後鞭。信得決。願得切。雖散心念佛。亦得往生。信不真。願不猛。雖一心不亂。亦不得生。云何爲信。一者信阿彌陀佛願力。二者信釋迦文佛教語。三者信六方諸佛讚歎。夫世間正人君子。便無妄語。況彌陀釋迦。六方諸佛。豈有妄語。此而不信。真不可救。故須先生深信。勿起疑惑。云何爲願。一切時中。厭惡娑婆生死之苦。欣慕淨土菩提之樂。隨有所作。若善若惡。善則迴向求生。惡則懺願求生。更無二志。是名爲願。信願既具。則念佛方爲正行。改惡修善。皆爲助行。隨功力之淺深。以分九品。四土。纖毫不濫。只須自己簡察。不必旁問他人。謂深信切願念佛。而念佛時心多散亂者。卽是下品下生。深信切願念佛。而念佛時散亂漸少者。卽是下品中生。深信切願念佛。而念佛時便不散亂者。卽是下品上生。念到事一心不亂。不起貪瞋癡者。卽是中三品生。念到理一心不亂。任運先斷見思塵沙。亦能伏斷無明者。卽是上三品生。故信願持名者。能歷九品的確不謬也。故云得生與否。全由信願之有無。品

位高下。全由持名之深淺。又信願持名。消伏業障。帶惑往生。卽是凡聖同居淨土。信願持名。見思斷盡而往生者。卽是方便有餘淨土。信願持名。豁破一分無明而往生者。卽是實報莊嚴淨土。信願持名。持到究竟之處。無明斷盡而往生者。卽是常寂光淨土。故持名能淨四土。亦的確不謬也。問曰。如何持名能斷無明。答曰。所持之佛名。無論悟與不悟。無非一境三諦。能持之念心。無論達與不達。無非一心三觀。只爲衆生妄想執著。情見分別。所以不契圓常。殊不知能持者。卽是始覺。所持者。卽是本覺。今直下持去。持外無佛。佛外無持。能所不二。則始覺合乎本覺。名究竟覺矣。問曰。既始覺合本。則當下卽常寂光。如何亦說往生。答曰。若達當下卽常寂光。又何妨說箇往生。說往卽非往。非往而往。生卽無生。無生而生。文殊善財之生西方者。此也。咄哉。男子。無措思惟。伏願緇素智愚。於此簡易直捷。無上圓頓法門。勿視爲難。而輒生退諉。勿視爲易。而漫不策勤。勿視爲淺。而妄致藐輕。勿視爲深。而不敢承任。蓋所持之名號。眞實不可思議。能持之心性。亦眞實不可思議。持一聲則一聲不可思議。持十

百千萬。無量無數聲。聲聲皆不可思議也。順治十年冬。有疾。遺命閣維後。屑骨和粉。分施禽魚。結西方緣。明年正月二十一日晨起。病良已。午刻跌坐繩牀。向西稱佛。舉手而逝。年五十七。既寂二年。如法閣維。啓龕。髮長覆耳。面貌如生。門人不忍從遺命。收其靈骨。建塔於靈峯。所著四十多種。俱行于世。內有選定淨土十要一書。凡修淨業者。不可不閱也。

蓮宗十祖

師諱實賢。字思齊。號省庵。常熟時氏子。世業儒。師生卽不茹葷。甫總角時。有出塵志。父早喪。母張氏。知其夙具善根。命爲釋氏子。七歲禮清涼庵容選和尚爲師。聰慧爽朗。經典過目不忘。十五薙染。兼通世典。能詩。善書法。前輩錢玉友。許暘谷。皆執節與交。然未嘗頃刻忘生死大事也。性篤孝。母亡。跪佛前諷報恩經。七七。歲時伏臘。必設像修供。他日至普仁寺。見一僧死仆地。師瞿然悟世無常。益加鞭策。年二十四。圓尸羅於昭慶。嚴習毘尼。不離衣鉢。日止一食。脅不帖席。率以爲常。庚寅。依渠成法師。

聽講法華圓義。謁紹曇法師。聽唯識楞嚴。止觀諸部。晝夜研窮。未三夏。三觀十乘之旨。性相之學。靡不通貫。曇師卽授記。蒞傳靈峯四世。天台正宗焉。甲午。叩靈鷲和尚於崇福。參向上事。四月。恍然契悟。曰。我夢覺矣。自是應機無礙。才辯縱橫。鷲欲付以衣拂。弗受辭去。遂禁足於真寂寺。日閱三藏梵筴。夕持西方佛名。三年期滿。寺衆請講法華。師升座開演。河懸泉湧。沛然莫禦。戊戌首春。止杭之隆興寺。紹曇法師命師代講經律。每擊節稱善。己亥春。詣四明阿育王山。瞻禮舍利。先後五然指香供佛。跪佛前發四十八願。感舍利放光。因作詩云。迦文滅度二千年。舍利於今尙燦然。自慶宿生何善利。得瞻光相塔門前。一顆如珠綴小鍾。青黃赤白現何窮。自心還見自心相。不是如來色不同。殿含寶塔塔含空。塵塵刹刹本自融。八萬非多一非少。毫端應現寶王宮。醫王雖去藥還留。慚愧癡兒病未瘳。讀罷涅槃遺教品。傷心不覺淚長流。是以每年佛涅槃日。大合緇白。廣修供養。講演彌陀遺教二經。示是心是佛之旨。三根普攝。法化洋溢。江浙黑白。傾心皈仰。作勸發菩提心文。激厲四衆。其言最爲痛切。

誦者多爲淚下。如是者歷有十載。法筵之盛。甲於諸方。又嘗應永福。普慶。海雲諸禪席。每進院。模範一新。清規肅穆。日講法華楞嚴諸部。執經問義者。翕集座下。未幾。退隱杭城仙林寺。不出戶庭。力修淨業。己酉冬。杭人茅靜遠。葉陞。皇甫子儀。李執玉。監院師省躬。一葦等。請主鳳山梵天講寺。於是屏絕諸緣。純提淨土。結長期。嚴立規約。晝夜六時。領衆行道。互相策勵。人皆謂永明再來也。先後主刹十餘載。得度弟子。洎乞戒皈依者。凡數百人。間有學詩文者。師痛誡曰。人命在呼吸間。那有閒工夫學世諦文字。稍有錯過。便成他世。欲望出離。難矣哉。雍正十一年癸丑。臘月佛成道日。謂弟子曰。我於明年四月十四日長往矣。自此掩關寸香齋。限晝夜課佛十萬聲。明年甲寅四月二日出關。十二告衆曰。我十日前見西方三聖降臨虛空。今再見矣。吾其生淨土乎。隨囑咐院事。徧辭城中諸外護。侍者以偈請。師書云。身在華中佛現前。佛光來照紫金蓮。心隨諸佛往生去。無去來中事宛然。書訖曰。吾十四日定往生矣。爾等爲我集衆念佛。十三早斷飲食。斂目危坐。五更具浴更衣。面西趺坐。至巳時。遠近

畢集。雪涕膜拜曰。願師住世度人。師復開目曰。吾去卽來。生死事大。各自淨心念佛。可矣。言訖。合掌連稱佛名而逝。少頃。鼻筋下垂。顏色明潤。迄封龕色不變。虞山上首無住師。以是歲臘月八日。奉靈骨塔于常熟琴川拂水巖之西。乾隆七年二月十五日。鄧山諸縉素。懷師道行。迎骨去。重建塔於阿育王寺之右。其舊塔以藏衣鉢云。師生於康熙二十五年八月初八日。示寂於雍正十二年四月十四日。世壽四十九。僧臘二十五。刻有省庵法師語錄一冊。略備始終。乃二林彭際清居士重訂本。刊板行世。讀者得益。妙難盡述。今錄其勸發菩提心文。以期閱者。咸修淨業。同生西方。文云。不肖愚下。凡夫僧寶賢。泣血稽顙。哀告現前大衆。及當世淨信男女等。唯願慈悲。少加聽察。嘗聞入道要門。發心爲首。修行急務。立願居先。願立則衆生可度。心發則佛道堪成。苟不發廣大心。立堅固願。則縱經塵劫。依然還在輪回。雖有修行。總是徒勞辛苦。故華嚴經云。忘失菩提心。修諸善法。是名魔業。忘失尙爾。况未發乎。故知欲學如來乘。必先具發菩薩願。不可緩也。然心願差別。其相乃多。若不指陳。如何趣向。今

爲大衆。略而言之。相有其八。所謂邪正真僞大小偏圓是也。云何名爲邪正真僞大小偏圓耶。世有行人。一向修行。不究自心。但知外務。或求利養。或好名聞。或貪現世欲樂。或望未來果報。如是發心。名之爲邪。既不求利養名聞。又不貪欲樂果報。唯爲生死。爲菩提。如是發心。名之爲正。念念上求佛道。心心下化衆生。聞佛道長遠。不生退怯。觀衆生難度。不生厭倦。如登萬仞之山。必窮其頂。如上九層之塔。必造其顛。如是發心。名之爲真。有罪不懺。有過不除。內濁外清。始勤終怠。雖有好心。多爲名利之所夾雜。雖有善法。復爲罪業之所染污。如是發心。名之爲僞。衆生界盡。我願方盡。菩提道成。我願方成。如是發心。名之爲大。觀三界如牢獄。視生死如怨家。但期自度。不欲度人。如是發心。名之爲小。若於心外見有衆生。及以佛道。願度願成。功勳不忘。知見不泯。如是發心。名之爲偏。若知自性是衆生。故願度脫。自性是佛道。故願成就。不見一法離心別有。以虛空之心。發虛空之願。行虛空之行。證虛空之果。亦無虛空之相可得。如是發心。名之爲圓。知此八種差別。則知審察。知審察。則知去取。知去取。則

可發心。云何審察。謂我所發心。於此八中。爲邪爲正。爲真爲僞。爲大爲小。爲偏爲圓。云何去取。所謂去邪去僞。去小去偏。取正取真。取大取圓。如此發心。方得名爲真正發善提心也。此善提心。諸善中王。必有因緣。方得發起。今言因緣。略有十種。何等爲十。一者念佛重恩故。二者念父母恩故。三者念師長恩故。四者念施主恩故。五者念衆生恩故。六者念生死苦故。七者尊重己靈故。八者懺悔業障故。九者求生淨土故。十者爲令正法得久住故。云何念佛重恩。謂我釋迦如來最初發心。爲我等故。行菩薩道。經無量劫。備受諸苦。我造業時。佛則哀憐。方便教化。而我愚癡。不知信受。我墮地獄。佛復悲痛。欲代我苦。而我業重。不能救拔。我生人道。佛以方便。令種善根。世生生隨逐於我。心無暫捨。佛初出世。我尙沈淪。今得人身。佛已滅度。何罪而生末法。何福而預出家。何障而不見金身。何幸而躬逢舍利。如是思惟。向使不種善根。何以得聞佛法。不聞佛法。焉知常受佛恩。此恩此德。邱山難喻。自非發廣大心。行菩薩道。建立佛法。救度衆生。縱使粉骨碎身。豈能酬答。是爲發善提心第一因緣也。云何念

父母恩。哀哀父母。生我劬勞。十月三年。懷胎乳哺。推乾去濕。曠苦吐甘。才得成人。指望紹繼門風。供承祭祀。今我等既已出家。濫稱釋子。忝號沙門。甘旨不供。祭掃不給。生不能養其口體。死不能導其神靈。於世閒則爲大損。於出世又無實益。兩途既失。重罪難逃。如是思惟。唯有百劫千生。常行佛道。十方三世。普度衆生。則不唯一生父母。生生父母俱蒙拔濟。不唯一人父母。人人父母盡可超昇。是爲發菩提心第二因緣也。云何念師長恩。父母雖能生育我身。若無世閒師長。則不知禮義。若無出世師長。則不解佛法。不知禮義。則同於異類。不解佛法。則何異俗人。今我等粗知禮義。略解佛法。袈裟被體。戒品沾身。此之重恩。從師長得。若求小果。僅能自利。今爲大乘。普願利人。則世出世閒二種師長。俱蒙利益。是爲發菩提心第三因緣也。云何念施主恩。謂我等今者日用所資。並非己有。三時粥飯。四季衣裳。疾病所須。身口所費。此皆出自他力。將爲我用。彼則竭力躬耕。尙難餬口。我則安坐受食。猶不稱心。彼則紡織不已。猶自艱難。我於安服有餘。甯知愛惜。彼則葦門蓬戶。擾攘終身。我則廣宇閒庭。

優游卒歲。以彼勞而供我逸。於心安乎。將他利而潤己身。於理順乎。自非悲智雙運。福慧二嚴。檀信沾恩。衆生受賜。則粒米寸絲。酬償有分。惡報難逃。是爲發菩提心第四因緣也。云何念衆生恩。謂我與衆生。從曠劫來。世世生生。互爲父母。彼此有恩。今雖隔世昏迷。互不相識。以理推之。豈無報效。今之披毛戴角。安知非昔爲其子乎。今之蠕動蜎飛。安知不曾爲我父乎。每見幼離父母。長而容貌都忘。何況宿世親緣。今則張王難記。彼其號呼於地獄之下。宛轉於餓鬼之中。苦痛誰知。飢虛安訴。我雖不見不聞。彼必求拯求濟。非經不能陳此事。非佛不能道此言。彼邪見人。何足以知此。是故菩薩觀於螻蟻。皆是過去父母。未來諸佛。常思利益。念報其恩。是爲發菩提心第五因緣也。云何念生死苦。謂我與衆生。從曠劫來。常在生死。未得解脫。人間天上。此界他方。出沒萬端。昇沈片刻。俄焉而天。俄焉而人。俄焉而地獄畜生。餓鬼。黑門。朝出而暮還。鐵窟暫離而又入。登刀山也。則舉體無完膚。攀劍樹也。則方寸皆割裂。熱鐵不除飢。吞之則肝腸盡爛。洋銅難療渴。飲之則骨肉都糜。利鋸解之。則斷而復續。

巧風吹之。則死已還生。猛火城中。忍聽叫嗥之慘。煎熬盤裏。但聞苦痛之聲。冰凍始凝。則狀似青蓮藥結。血肉既裂。則身如紅藕華開。一夜死生。地下每經萬徧。一朝苦痛。人間已過百年。頻煩獄卒疲勞。誰信閻翁教誡。受時知苦。雖悔恨以何追。脫已還忘。其作業也如故。鞭驢出血。誰知吾母之悲。牽豕就屠。焉識乃翁之痛。食其子而不知。文王尙爾。噉其親而未識。凡類皆然。當年恩愛。今作怨家。昔日寇讐。今成骨肉。昔爲母而今爲婦。舊是翁而新作夫。宿命知之。則可羞可恥。天眼視之。則可笑可憐。糞穢叢中。十月包藏難過。膿血道裏。一時倒下可憐。少也何知。東西莫辨。長而有識。貪欲便生。須臾而老病相尋。迅速而無常又至。風火交煎。神識於中潰亂。精血既竭。皮肉自外乾枯。無一毛而不被針鑽。有一竅而皆從刀割。龜之將烹。其脫殼也猶易。神之欲謝。其去體也倍難。心無常主。類商賈而處處奔馳。身無定形。似房屋而頻頻遷徙。大千塵點。難窮往返之身。四海波濤。孰計別離之淚。峨峨積骨。過彼崇山。莽莽橫尸。多於大地。向使不聞佛語。此事誰見誰聞。未覩佛經。此理焉知焉覺。其或依前貪

戀。仍舊癡迷。祇恐萬劫千生。一錯百錯。人身難得而易失。良時易往而難追。道路冥冥。別離長久。三途惡報。還自受之。痛不可言。誰當相代。興言及此。能不寒心。是故宜應斷生死流。出愛欲海。自他兼濟。彼岸同登。曠劫殊勛。在此一舉。是爲發菩提心第六因緣也。云何尊重己靈。謂我現前一心。直下與釋迦如來無二無別。云何世尊無量劫來。早成正覺。而我等昏迷顛倒。尙做凡夫。又佛世尊。則具有無量神通智慧。功德莊嚴。而我等則但有無量業繫煩惱。生死纏縛。心性是一。迷悟天淵。靜言思之。豈不可恥。譬如無價寶珠。沒在淤泥。視同瓦礫。不加愛重。是故宜應以無量善法。對治煩惱。修德有功。則性德方顯。如珠被濯。懸在高幢。洞達光明。映蔽一切。可謂不孤佛化。不負己靈。是爲發菩提心第七因緣也。云何懺悔業障。經言犯一吉羅。如四天王壽五百歲。墮泥犁中。吉羅小罪。尙獲此報。何況重罪。其報難言。今我等日用之中。一舉一動。恆違戒律。一殮一水。頻犯尸羅。一日所犯。亦應無量。何況終身歷劫。所起之罪。更不可言矣。且以五戒言之。十人九犯。少露多藏。五戒名爲優婆塞戒。尙不具足。

何況沙彌比丘菩薩等戒。又不必言矣。問其名。則曰我比丘也。問其實。則尙不足爲優婆塞也。豈不可愧哉。當知佛戒不受則已。受則不可毀犯。不犯則已。犯則終必墮落。若非自慙慙他。自傷傷他。身口併切。聲淚俱下。普與衆生。求哀懺悔。則千生萬劫。惡報難逃。是爲發菩提心第八因緣也。云何求生淨土。謂在此土修行。其進道也難。彼土往生。其成佛也易。易故一生可致。難故累劫未成。是以往聖前賢。人人趣向。千經萬論。處處指歸。末世修行。無越於此。然經稱少善不生。多福乃致。言多福。則莫若執持名號。言多善。則莫若發廣大心。是以暫持聖號。勝於布施百年。一發大心。超過修行歷劫。蓋念佛本期作佛。大心不發。則雖念奚爲。發心爲原修行。淨土不生。則發雖易退。是則下菩提種。耕以念佛之犁。道果自然增長。乘大願船。入於淨土之海。西方決定往。生是爲發菩提心第九因緣也。云何令正法久住。謂我世尊無量劫來。爲我等故。修苦難道。難行能行。難忍能忍。因圓果滿。遂致成佛。既成佛已。化緣周訖。入於涅槃。正法像法。皆已滅盡。僅存末法。有教無人。邪正不分。是非莫辨。競爭人我。盡

逐利名。舉目滔滔。天下皆是。不知佛是何人。法是何義。僧是何名。衰殘至此。殆不忍言。每一思及。不覺淚下。我爲佛子。不能報恩。內無益於己。外無益於人。生無益於時。死無益於後。天雖高不能覆我。地雖厚不能載我。極重罪人。非我而誰。由是痛不可忍。計無所出。頓忘鄙陋。忽發大心。雖不能挽回末運於此時。決當圖護持正法於來世。是故偕諸善友。同到道場。述爲懺摩。建茲法會。發四十八之大願。願願度生。期百千劫之深心。心心作佛。從於今日。盡未來際。畢此一形。誓歸安養。既登九品。回入娑婆。俾得佛日重輝。法門再闡。僧海澄清於此界。人民被化於東方。劫運爲之更延。正法得以久住。此則區區眞實苦心。是爲菩提心第十因緣也。如是十緣備識。八法周知。則趣向有門。開發有地。相與得此人身。居於華夏。六根無恙。四大輕安。具有信心。幸無魔障。况今我等又得出家。又受具戒。又遇道場。又聞佛法。又瞻舍利。又修懺法。又值善友。又具勝緣。不於今日發此大心。更待何日。唯願大衆。愍我愚誠。憐我苦志。同立此願。同發是心。未發者今發。已發者增長。已增長者今令相續。勿畏難而退怯。

勿視易而輕浮。勿欲速而不久長。勿懈怠而無勇猛。勿委靡而不振起。勿因循而更期待。勿因愚鈍而一向無心。勿以根淺而自鄙無分。譬諸種樹。種久則根淺而日深。又如磨刀。磨久則刀鈍而成利。豈可因淺勿種。任自其枯。因鈍弗磨。置之無用。又若以修行爲苦。則不知懈怠尤苦。修行則勤勞暫時。安樂永劫。懈怠則偷安一世。受苦多生。况乎以淨土爲舟航。則何愁退轉。又得無生爲忍力。則何慮艱難。當知地獄罪人。尙發菩提於往劫。豈可人倫佛子。不立大願於今生。無始昏迷。往者既不可諫。而今覺悟。將來猶尙可追。然迷而未悟。固可哀憐。苟知而不行。尤爲痛惜。若懼地獄之苦。則精進自生。若念無常之速。則懈怠不起。又須以佛法爲鞭策。善友爲提攜。造次弗離。終身依賴。則無退失之虞矣。勿言一念輕微。勿謂虛願無益。心眞則事實。願廣則行深。虛空非大。心王爲大。金剛非堅。願方最堅。大衆誠能不棄我語。則菩提眷屬。從此聯姻。蓮社宗盟。自今締好。所願同生淨土。同見彌陀。同化衆生。同成正覺。則安知未來三十二相。百福莊嚴。不從今日發心立願而始也。願與大衆共勉之。則幸甚。

悟開口。菩提心文。悲心廣大。四十八願。願力宏深。化導懇切。修持精進。一時清信之士。聞風欽仰。至今九十年。人猶稱之不替。唯其行解真實。瑞應超卓。當清初之時。巍然傑出。奉爲蓮宗正祖。不亦宜乎。

蓮宗十一祖

師諱醒際。字徹悟。一字訥堂。又號夢東。京東豐潤縣人。俗姓馬。父諱萬璋。母高氏。師幼而穎異。長喜讀書。經史羣籍。靡弗采覽。二十二歲。因大病。悟幻質無常。發出世志。病已。至房山縣。投三聖庵。榮池老宿。薙髮。越明年。詣岫雲寺。恆律實師。圓具。次年聞香界寺隆一法師。開演圓覺。師預會焉。晨夕研詰。精求奧義。遂悟圓覺全經大旨。復依增壽寺慧岸法師。聽講相宗。妙得其要。後歷心華寺。徧空法師座下。聽法華楞嚴金剛等經。圓解頓開。於性相二宗。三觀十乘之旨。了無滯礙。乾隆三十三年冬。參廣通粹如純翁。明向上事。師資道合。乃印心焉。是爲臨濟三十六世。磬山七世也。三十八年。粹翁遷主萬壽寺。師繼席廣通。率衆參禪。策勵後學。津津不倦。十四年如一日。

聲馳南北。宗風大振。每憶永明延壽禪師。乃禪門宗匠。尙歸心淨土。日課十萬彌陀。期生安養。况今末代。尤宜遵承。遂棲心淨土。主張蓮宗。數十年來。所有積稿。一旦付之丙丁。不存一矣。於是輟參念佛。純提淨土。而禪者願隨者頗夥。日限尺香。晤客過此。惟禮拜持念而已。五十七年。遷覺生寺。住持八年。百廢盡舉。於淨業堂外。別立三堂。曰涅槃。曰安養。曰學士。俾老病者有所依託。初學便於誦習。師於禪淨宗旨。皆深造其精奧。律已甚嚴。望人甚切。開導說法。如瓶瀉雲興。與衆精修。蓮風大扇。邇遐仰化。道俗歸心。當時法門。爲第一人。嘉慶五年。退居紅螺山資福寺。以期終歲。衲子依戀。追隨者甚衆。師爲法爲人。心終無厭。遂復留衆。俄成叢席。擔柴運水。泥壁補屋。一飲一殮。與衆共之。師嘗示衆念佛語云。吾人現前一念之心。全真成妄。全妄卽真。終日不變。終日隨緣。夫不隨佛界之緣而念佛。便念九界。不念三乘。便念六凡。不念人天。便念三途。不念鬼畜。便念地獄。以凡在有。心不能無念。以無念心體。唯佛獨證。自等覺已還。皆悉有念。凡起一念。必落十界。更無有念。出十界外。以十法界。更無外故。

每起一念。爲一受生之緣。果知此理。而不念佛者。未之有也。若此心能與平等大慈大悲依正功德。以及萬德洪名相應。卽念佛法界也。能與菩提心六度萬行相應。卽念菩薩法界也。以無我心。與十二因緣相應。卽念緣覺法界也。以無我心。觀察四諦。卽念聲聞法界也。或與四禪八定。以及上品十善相應。卽念天法界也。若與五戒相應。卽念人法界也。若修戒善等法。兼懷嗔慢勝負之心。卽落修羅法界。若以緩輒心。念下品十惡。卽墮畜生法界。或以緩急相半心。與中品十惡相應。便墮餓鬼法界。若以猛熾心。與上品十惡相應。卽墮地獄法界也。十惡者。卽殺盜淫。妄言。綺語。惡口。兩舌。貪。瞋。邪見是。反此則爲十善。當密自檢點。日用所起之念。與何界相應者多。與何界相應者猛。則他日安身立命之處。不勞更問人矣。又曰。眞爲生死。發菩提心。以深信願。持佛名號。十六字爲念佛法門一大綱宗。若眞爲生死之心不發。一切開示皆爲戲論。世間一切重苦。無過生死。生死不了。生死死死。生生死死。出一胞胎。入一胞胎。捨一皮袋。取一皮袋。苦已不堪。况輪迴未出。難免墮落。猪胞胎。狗胞胎。何所不鑽。

驢皮袋。馬皮袋。何所不取。此箇人身。最爲難得。最易打失。一念之差。便入惡趣。三途易入而難出。地獄時長而苦重。七佛以來。猶爲蟻子。八萬劫後。未脫鷓身。畜道時長已極。鬼獄時長尤倍。久經長劫。何了何休。萬苦交煎。無歸無救。每一言之。衣毛卓豎。時一念及。五內如焚。是故卽今痛念生死。如喪考妣。如救頭然也。然我有生死。我求出離。而一切衆生皆在生死。皆應出離。彼等與我。本同一體。皆是多生父母。未來諸佛。若不念普度。唯求自利。則於理有所虧。心有未安。況大心不發。則外不能感通諸佛。內不能契合本性。上不能圓成佛道。下不能廣利羣生。無始恩愛。何以解脫。無始怨愆。何以解釋。積劫罪業。難以懺除。積劫善根。難以成就。隨所修行。多諸障緣。縱有所成。終墮偏小。故須稱性發大菩提心也。然大心旣發。應修大行。而於一切行門之中。求其最易下手。最易成就。至極穩當。至極圓頓者。則無如以深信願。持佛名號矣。所謂深信者。釋迦如來。梵音聲相。決無誑語。彌陀世尊。大慈悲心。決無虛願。且以念佛求生之因。必感見佛往生之果。如種瓜得瓜。種豆得豆。響必應聲。影必隨形。因不

虛棄。果無浪得。此可不待問佛而能自信者也。况吾人現在一念心性。全真成妄。全妄卽真。終日隨緣。終日不變。橫徧豎窮。當體無外。彌陀淨土。總在其中。以我具佛之心。念我心具之佛。豈我心具之佛。而不應我具佛之心耶。往生傳載。臨終瑞相。班班列列。豈欺我哉。如此信已。願樂自切。以彼土之樂。回觀娑婆之苦。厭離自深。如離廁坑。如出牢獄。以娑婆之苦。遙觀彼土之樂。欣樂自切。如歸故鄉。如奔寶所。總之如渴思飲。如饑思食。如病苦之思良藥。如嬰兒之思慈母。如避怨家之持刀相迫。如墮水火而急求救援。果能如此懇切。一切境緣莫能引轉矣。然後以此信願之心。執持名號。持一聲是一九蓮種子。念一句是一往生正因。直須心心相續。念念無差。唯專唯勤。無雜無間。愈久愈堅。轉持轉切。久之久之。自成片段。入一心不亂矣。誠然如此。若不往生者。釋迦如來。便爲誑語。彌陀世尊。便爲虛願。有是理乎哉。又曰。吾人生死關頭。唯二種力。一者心緒多端。重處偏墜。此心力也。二者如人負債。強者先牽。此業力也。業力最大。心力尤大。以業無自性。全依於心。心能造業。心能轉業。故心力唯重。業

力唯強。乃能牽生。若以重心而修淨業。淨業則強。心重業強。唯西方是趣。則他日報終命盡。定往西方。不生餘處矣。如大樹大牆。尋常向西而歪。他日若倒。決不向餘處也。何謂重心。我輩修習淨業。信貴於深。願貴於切。以信深願切故。一切邪說莫能搖惑。一切境緣莫能引轉。若正修淨業時。倘達摩大師忽現在前。乃曰。吾有直指人心見性成佛之禪。汝但捨置念佛。吾卽以此禪授汝。但當向祖師作禮。謂我先已受釋迦如來念佛法門。發願受持。終身不易。祖師雖有深妙禪道。吾則不敢自違本誓也。縱或釋迦如來忽爾現身。謂曰。吾先說念佛法門。特一時方便耳。今更有殊勝法門。超於彼者。汝當且置念佛。吾卽爲說勝法。亦祇可向佛稽首陳白。我先稟受世尊淨業法門。發願一息尙存。決不更張。如來雖有勝法。吾則不敢自違本願也。雖佛祖現身。尙不改其所信。況魔王外道。虛妄邪說。豈足以搖惑之耶。能如是信。其信可謂深矣。若赤熱鐵輪。旋轉頂上。不以此苦。退失往生之願。若輪王勝妙五欲現前。亦不以此樂。退失往生之願。此逆順至極。尙不改所願。況世間小小逆順境界。豈能引轉哉。

能如是願。其願可謂切矣。信深願切。是謂重心。而修淨業。淨業必強。心重故則易純。業強故則易熟。極樂淨業若熟。娑婆染緣便盡。果得染緣已盡。則臨終時。雖欲輪迴境界。再現在前。亦不可得。果得淨業已熟。則臨終時。雖欲彌陀淨土。不現在前。亦不可得。然此信願。要在操之有素。臨時自不入於岐路。如古德臨欲命終。六欲天童。次第接引。皆不去。唯專心待佛。後佛現。乃曰。佛來也。遂合掌而逝。夫臨欲命終。四大分張。此何時也。六欲天童。次第接引。此何境也。苟素常信願不到十分堅固。當此時。對此境。而能強作主宰乎。如古德真可謂千古修淨業者之標榜矣。問。諸方皆有淨土。何專讚西方。求願往生耶。答。此非人師意也。乃金口誠言。分明指示故。大乘顯密諸經。同指歸故。令初心人專注一境。三昧易成故。四十八願爲緣。緣強故。十念爲因。因勝故。佛與衆生偏有緣故。此土衆生無論僧俗男女。老幼善惡之人。當其處極順逆苦樂境緣之時。多必由中而發。衝口而出。念佛一聲。然不念佛則已。凡念佛必念阿彌陀佛。此誰使之然。蓋衆生久蒙佛化。久受佛恩。與佛緣深故也。且此彌陀一經。羅

什最初譯成。東林遠祖。卽與一百二十三人。結社念佛。其一百二十三人。以次漸化。臨終皆留瑞應。雖鸚鵡八哥念佛。化時皆有瑞相。此非衆生與佛緣深。謂之何哉。又無量壽經云。當來經道滅盡。我以願力。特留此經。更住百年。廣度含識。夫不留他經。而獨留此經者。豈非以此法門。下手易而攝機普。入道穩而獲益速耶。以是而知。其時愈後。此法愈當機矣。一句佛號。不雜異緣。十念功成。頓超多劫。於此不信。眞同木石。捨此別修。非狂卽癡。復何言哉。又曰。知小而不知大。見近而不見遠者。此衆生之常分也。如阿彌陀佛。於諸衆生。有大恩德。衆生不知也。佛於無量劫前。對世自在王佛。普爲惡世界苦衆生。發四十八種大願。依願久經長劫。修菩薩行。捨金輪王位。國城妻子。頭目腦髓。不知其幾千萬億。此但萬行中內外財布施一行也。如是忍人所不能忍。行人所不能行。圓修萬行。力極功純。嚴成淨土。自致成佛。分身無量。接引衆生。方便攝化。令生彼國。然則如爲一人。衆多亦然。如爲衆多。一人亦然。若以衆多視之。佛則普爲一切衆生也。若以一人視之。佛則專爲我也。稱性大願。爲我發也。

長劫大行。爲我修也。四土爲我嚴淨也。三身爲我圓滿也。以至頭頭現身接引。處處顯示瑞應。總皆爲我也。我造業時。佛則警覺我。我受苦時。佛則拔濟我。我皈命時。佛則攝受我。我修行時。佛則加被我。佛之所以種種爲我者。不過欲我念佛也。欲我往生也。欲我永脫衆苦。廣受法樂也。欲我展轉化度一切衆生。直至一生補佛而後已也。噫。佛之深恩重德。非父母所可比。雖天地不足喻其高厚矣。非聞開示。安知此意。不讀佛經。安曉此理。今而後已知之矣。唯有竭力精修。盡報皈誠。拌命念佛而已。復何言哉。師居紅螺十年。至嘉慶十五年。二月詣萬壽寺。掃粹祖塔。辭諸山外護。囑曰。幻緣不久。人世非常。虛生可惜。各宜努力念佛。他年淨土好相見也。三月還山。命預辦茶毘事物。十月十七日。集衆付院務。命弟子松泉。領衆住持。誡曰。念佛法門。三根普被。無機不收。吾數年來。與衆苦心建此道場。本爲接待方來。同修淨業。凡吾所立規模。永宜遵守。不得改弦易轍。庶不負老僧與衆一片苦心也。臨示寂半月前。覺身微疾。命大衆助稱佛號。見虛空中幢幡無數。自西而來。乃告衆曰。淨土相現。吾將西

歸矣。衆以住世相勸。師曰：百年如寄，終有所歸。吾得臻聖境，汝等當爲師幸。何苦留耶？十二月十六日，命監院師貫一設涅槃齋。十七日申刻告衆曰：吾昨已見文殊觀音，勢至三大士，今復蒙佛親垂接引，吾今去矣。衆稱佛號愈厲。師面西端坐，合掌曰：稱一聲洪名，見一分相好，遂手結彌陀印，安詳而逝。衆聞異香浮空，供奉七日，面貌如生。慈和豐滿，髮白變黑，光潤異常。二七入龕，三七茶毘，獲舍利百餘粒。門弟子遵遺命，請靈骨葬於普同塔內。師生於乾隆六年十月十四日未時，示寂於嘉慶十五年十二月十七日申時，世壽七十。僧臘四十九。法臘四十有三。有徹悟禪師語錄一冊，示禪教律念佛伽陀，行於世。嘉慶十七年壬申九月既望，有師之弟子惺聰者，持師行實請述於余。余與師相契有年，素蒙開誨，啓迪良多。師真過量人也。六根通利，解悟超常，既具辯才，兼持苦行，終始如一。余所目覩，故此述不容一字假飾。愧余不文，特質言之，以爲傳信云爾。拈花寺慕蓮杜多體寬通申敬述。

跋

拈華一脈。分列五枝。雖法道是同。而門庭稍別。故宗旨亦異也。歷代傳法之人。各宗其宗。載之五燈。皎如日月焉。其淨土一門。建立蓮宗。法道不出三經。宗旨純歸念佛。而遞代相傳。正法眼藏。固不可散漫而無稽也。茲蓮華主人。編集是冊。示余。余焚香讀已。作而曰。善哉。我佛愍念末世衆生之心。諸祖宏揚淨土之道。僅五十餘紙。了然明白。猶如摩尼寶珠。繫於七寶高幢之上。有目之徒。誰不知珍重者乎。是樂邦之左券也。賴是傳持無盡。得與五燈並燄。厥功偉哉。請亟付之剞劂氏。道光甲申仲秋朔日。同學弟悟靈謹跋。

重刻跋

淨土法門者。乃兩土教主。大慈大悲。同願利生。令末世障重衆生。橫超三界。直登九品之大方便門也。所以歷代祖師。剖心瀝血。種種著述。深勸往生。以故悟開法師。編集蓮宗十一祖傳。意欲令人得正知正見。決志念佛求生故也。余初展讀已。如貧得寶。如暗遇燈。慶幸之至。然淨土法門。其書甚多。惟此一書。簡而易遵。實爲蓮宗之正

軌。諸祖之心要。惜道光至今。其版日漸模糊。恐久埋沒。是以募資重刊。吾觀祖師生平實行。及臨終瑞應。足可令人堅固信願。其信願既堅。念佛一行。自然精進。淨業者。果能具此信願行三種資糧。則臨命終時。見佛往生。固無疑矣。當知此書。誠可謂蓮宗之眼目。淨土之指南。欲生西方者。必不可不讀也。時光緒戊戌春恩西學人敬然臂香十二炷稽首謹撰

覺悟前非

靈芝照律師。初發誓願。常在娑婆濁世。拔濟衆生。復見高僧傳。慧布法師云。方土雖淨。非吾所願。若使十二劫蓮花中受樂。何如三塗苦處救衆生也。由是堅執所見。於淨土法門。略無信向。見修淨業者。復生輕謗。後遭重病。色力尪羸。神識茫然。莫知趣向。既而病差。頓覺前非。悲泣感傷。深自痛責。志雖洪大。力未堪任。仍閱天台十疑論。初心菩薩。未得無生法忍。要須常不離佛。又引智度論云。具縛凡夫。有大悲心。願生惡世。救苦衆生。無有是處。譬如嬰兒。不得離母。又如弱羽。祇可纏枝。自是盡棄平生。

所學專尋淨土教門。二十餘年。未嘗暫捨。研詳理教。披括古今。頓釋羣疑。愈加深信。
不求勝進

靈芝觀經疏曰。有人發願願未得道前。所生之處。值佛聞法。童真出家。今謂若生淨土。則任運值佛爲僧。只由不知淨土。故有此願。禪講宗師。率多此見。嘗試語曰。汝今已得男子爲僧。只合便求出離。何乃復求男子。再願出家。略無勝進乎。

法雨涓滴錄

附哀啓

中華民國十五年堯曆三月辛卯。爲我先母葉宜人卜葬之辰。不孝奮等乃恭錄我

師普陀法雨寺印光老人最近所賜手諭一十通。付石流傳。以垂紀念。因泣述曰。

先母生平恭儉寬惠。綜理家政。特具才識。尤善繼我先曾庶祖妣。先外祖妣。庶祖母志業。虔修佛法。或有所禱。必以祈天下太平爲主。不專以自利眷屬爲事。且常思以素所積蓄。營辦善舉。永利後人。甲子仲春。航海普陀。邦雄隨侍。皈依 印光

老人。禮懇開示。老人卽勸以放下萬緣。專心念佛。豫備生西。曉導再三。聞之下

淚。又私謂邦雄曰。吾恐汝母不久人世。須婉勸念佛而善事之。先母既歸年餘。果

於去秋八月初間。忽患氣喘。益以胃腸舊恙復發。中西醫治。皆難奏效。自悔不聽

師父諄囑。乃命奮等迭稟老人。哀求加被。初則尙望痊瘳。繼而始知生死危險。

於是益修檀度。決意西歸。命提所積。用作功德。以多分交 老人主持。少分由奮

等相宜爲之。奮等當卽祇遵次第了辦。延至本年二月二日早晨。氣喘復劇。腹微痛。旋令家人扶之起坐。急爲念佛。助我往生。家人聞命環集。擊磬齊聲念佛。移時鼻尖漸冷。兩目凝視。奮敬奉阿彌陀佛聖像示之。於是忽現悅豫之色。了無顧戀之情。默持佛號。繇續不停。甫交未初。安然而逝。以佛經云。亡者氣絕。神識未盡。若卽舉哀及動轉屍身。於亡者大爲不利。奮等不敢違越佛言。貽親伊戚。故皆力抑悲痛。專注念佛。歷五小時。始爲平臥。沐浴更衣。含殮哭奠。不御繒帛衣衾。屏除放炮俗例。是日佛聲達旦始息。嗚呼哀哉。奮等素昧醫藥。兼疏調護。致使先母臥病半年。以至長逝。罪孽深重。百身莫贖。痛何有極。惟賴老人悲願加持。殷勤啓迪。雖以奮等不孝頑愚。猶知感勉。自先母發病之日。以迄今茲。舉凡大小措施。悉秉老人慈旨。力祛俗議。冀報親恩。或可消除不孝之罪於萬一耶。至夫老人行解超邁。中興淨土。旁護諸宗。顯揚佛法。隱淑世風。近百餘年。所不多見。開導學人。語語沈實。流自肺腑。本諸經論。不銜奧祕。如談家常。應折伏者。禪宿

魁儒。或遭呵斥。應攝受者。後生末學。亦與優容。古德云。情無適莫。惟理是依。老人有之。以故雖不高張筵座。施設門庭。而四遠奔投。若百川之赴大海。噫。倘非承囑再來。何能爾乎。向所著述。廿餘萬言。悉已刻入文鈔。風行海內。近作尤富。將交續刻。茲所錄者。特法雨涓滴耳。雖然。卽此涓滴中。已具養生送死之大全。承先啓後之綱要。理融真俗。惠普殛存。成佛作祖。不妨由此。所謂無量法。攝在一微塵。香

等 低徊梵響。感荷慈恩。縱使窮劫供養。未足以酬毫末。尙祈當世 孝友君子。明哲達人。共加省覽。植蓮蕊真因。結菩提妙果。一切衆生。同圓正覺。不勝奢願哀感懇禱之至。 棘人周奮。雄邦。邦新。邦楚。同稽顙。

羣錚慧鑑。汝母年高。於淨土一法。未能認真修持。宜常與談說六道輪迴之苦。極樂世界之樂。人生世間。超升最難。墮落最易。若不往生西方。且莫說人道不足恃。卽生於天上。福壽甚長。福力一盡。仍舊墮落人間。及三途惡道受苦。不知佛法。則無可如何。今既略曉佛法。豈可將此一番大利益事。讓與別人。自己甘心在六道輪迴中。頭

出頭沒。永無解脫之日乎。如是說之。或可發其宿世善根。信受奉行也。菩薩度生。隨順機宜。先以欲鉤牽。後令入佛智。汝能力修孝友。及以淨土法門。勸導自己眷屬。及一切有緣者。同作蓮池會裏人。則功大德矣。乙丑九月十五

羣錚慧鑑。世人有病。及有危險災難等。不知念佛修善。妄欲祈求鬼神。遂致殺害生命。業上加業。實爲可憐。人生世間。凡有境緣。多由宿業。既有病苦。念佛修善。懺悔宿業。業消則病瘳。彼鬼神自己尙在業海之中。何能令人消業。即有大威力之正神。其威力若比佛菩薩之威力。直同螢火之比日光。佛弟子不向佛菩薩祈禱。向鬼神祈禱。卽爲邪見。卽爲違背佛教。不可不知。又一切衆生。皆是過去父母。未來諸佛。理宜戒殺護生。愛惜物命。切勿依世俗知見。謂奉父母甘旨爲孝。彼未聞佛法者。不知六道輪迴之事理。妄謂爲孝。尙有可原。若已聞佛法之人。殺過去父母親屬。以奉養現在父母及喪祭等。豈但不是孝道。直成忤逆矣。是以通人達士。由聞佛法之眞實義諦。悉不肯依世俗之權法以行。以此權法。殆姑順世俗迷情而立。非如來洞徹三世

因果之道故也。若欲深知取文鈔中諸戒。殺文及觀音頌之普勸戒殺挽劫文。閱之自知。

乙丑九月廿六

孟由慧鑑。念佛人有病。一心待死。若世壽未盡。則能速瘳。以全身放下念佛。最能消業。業消則病瘳矣。若不放下。欲求好。倘不能好。則決定無由往生。以不願生故。此等道理不明白。尙能得仗佛力乎。汝母之病。宜切勸放下求往生。如壽未盡。求往生。反能速瘳。以心至誠故。汝母羣錚及守良之妻。皆以此告之。令勿效癡人說癡話也。乙

丑十月初十

孟由慧鑑。昨守良以汝書寄來。知汝母求生之心。尙未實發。病中且勿提及。但勸至心念佛。卽得蒙佛加被。身心安樂。待大好後。婉曲勸導。令其求生。則利益大矣。并祈於汝母前。代爲問好。又當爲說光勸彼放下一切。一心念佛。是爲自己要事。餘皆是替兒孫殫心。有累自己念佛的利益了。

乙丑十月十九

羣錚慧鑑。接手書。備悉一切。汝母現有病。斷不可不瘳而去。然光看汝母恐難高壽。

宜與孟由及智昭等。日換班在旁念佛。俾其隨念。不念則聽。若世壽盡。如此行。則決定往生。若世壽未盡。亦當消除業障。增長善根。如汝決欲來山。只好照汝此議。庶兩無所礙。現汝母病未瘳。決不可發此心。發則於世間世出。兩俱違悖矣。人之臨終。得其助念。定可往生。失其助念。或再以哭泣搬動。動其愛情。嗔恨。則墮落難免矣。險極險極。汝能成就母往生。亦是三世諸佛淨業正因。所謂卽塵勞行佛事。其功德比尋常殊勝萬分矣。祈與孟由說此助念。并告汝母令聽光言。至爲親開陳佛法。固爲大善。然定省撫慰。亦須格外留意。幸甚。乙丑十一月初二

孟由等鑑。汝母發願寄款交光。隨意作功德。及助印文鈔。依光鄙見。做功德當以開人智識爲最。擬以此款任印觀音頌。普徧施送於遠近。俾一切人同知觀音大士。爲法界衆生之恃怙。隨類現身。尋聲救苦。兼以輔弼彌陀。接引衆生。况乎今日世道。日在患難中。無法防護。倘人人見此書。知大士之恩德。無不欲仗其威力。以免災禍。既發信仰。依賴大士之心。自然心存慈善。改往修來。以期不與大士相背。而得蒙其覆

庇護祐也。世之不治。由於人心險惡。倘人能仰慕大士之慈悲。自可日臻善域。是故此書流通。其利無窮。比校別種暫時之益者。實相去天淵。且以此增汝母福慧。消汝母罪愆。必能生獲安樂。沒歸蓮邦。至於蕪鈔。則見之發心修善念佛者甚多。茲不具書。乙丑十一月初五

羣錚慧鑑。汝母何以病不見瘳。蓋以宿業所致。殆轉重報後報爲現報輕報。於此時以了之乎。玄奘法師臨終亦稍有病苦。心疑所譯之經。或有錯謬。有菩薩安慰言。汝往劫罪報。悉於此小苦消之。勿懷疑也。當以此意安慰汝母。勸彼生歡喜心。勿生怨恨心。則決定可蒙佛加被。壽未盡而速瘳。壽已盡而往生耳。凡人當病苦時。作退一步想。則安樂無量。近來兵火連縣。吾人幸未罹此。雖有病苦。尙可作欲出苦之警策。則但宜感激精修。自得利益。否則怨天尤人。不但宿業不能消。且將更增怨天尤人之業。當與汝母汝妻汝弟婦說之。果能不怨不尤。淨心念佛。其消業也。如湯消雪。光自回山。日日於課誦回向時。爲汝母回向。祈三寶加被。壽未盡則速瘳。壽已盡則速

往生西方耳。乙丑十二月廿六

孟由羣錚慧鑑。接手書。知汝母已於初二日念佛往生。不勝傷歎。雖然。汝等既知佛法。當依佛法。令親神識得益爲事。不可徒爲哀毀。令存亡兩無所益。至於喪祭。通須用素。勿隨俗轉。縱不知世務者。謂爲不然。亦任彼譏笑而已。喪葬之事。不可過爲鋪排張羅。做佛事只可念佛。勿做別佛事。並令全家通皆懇切念佛。則於汝母。於汝等諸眷屬。及親戚朋友。皆有實益。有財力。多做功德。若喪事用度無出。卽以之辦喪事亦可。切勿硬撐架子。至有虧空。後來受窘。則不必矣。丙寅二月初五

孟由等鑑。接手書。知汝母去得甚好。此殆汝母往昔善根。及現在善願。并汝等助成之功效也。人一生事事皆可僞爲。唯臨死之時。不可僞爲。況其無愛戀之情。有悅豫之色。安坐而逝。若非淨業成熟。曷克臻此。但願汝昆弟與闔家眷屬。認真爲汝母念佛。不但令母親得益。實則比自己念佛之功德更大。佛所以教人。凡誦經持呪念佛。作諸功德。皆爲法界衆生回向。平時尙爲無干涉之法界衆生回向。況母歿而不至

心爲母念佛乎。以能爲一切衆生回向。卽與佛菩提誓願相合。如一滴水。投於大海。卽與大海同其深廣。如未到海。則勿道一滴。卽長江大河。固與大海天地懸殊也。知此義。凡施於親及一切人者。皆屬自培自福耳。知此義。有孝心者。孝心更加增長。無孝心者。亦當發起孝心。請僧念七七佛甚好。念時汝兄弟必須有人隨之同念。婦女不必隨於僧次。以爲日既多。人情熟悉。或令人起嫌疑。婦女宜另設一所。或居於幕。出入各門戶。兩不相見。是爲表率鄉邑。開通儀式之懿範。若漫無界限。或他人仿之。久則弊生。昔人立法。雖上上人。亦以下人之法爲範圍。故能無弊。汝昆弟能如是爲母念佛。兼又施印觀音頌文鈔等。有此善心淨資。并利人之事之功德。豈但汝母蓮品增高。將見汝祖父母汝父并歷代祖妣。同沾法利。同得往生也。光之所說。乃本理本情。非漫然爲汝等說悅心快意語也。富貴人家子弟。多不成器。其源由於愛之不得其道。或偏與錢財。或偏令穿好衣服。錢隨彼用。則必至妄吃致病。若爲彼存以生息。餘不得者。於父母生嫌心。於所偏得兄弟姊妹生忌心。皆非所以教孝教弟之

道。若女有錢。出嫁必以錢自驕。或輕其夫。或不洞事。以錢助夫爲不法事。光出於寒家。家無餘蓄。與吾家兄來去省垣讀書七八年。於路上尙不存一文錢。況其安居家中學中乎。從來未曾特買過一文錢之東西吃。以自己無一文錢。而家中之錢。亦不肯偷取自用。欲兒女成賢人。當爲培福。不當爲積財。財爲禍本。汝等看多少白手起家者。皆由無錢。自勤而來。而大富家多多不久。房產一空。故古人云。遺子黃金滿籬。不如教子一經。能讀則讀。不能讀。或農或工或商。各有一業。爲立身養家之本。女子若有錢。明道理。錢固爲助道之本。不明道理。則害其女。并害其婿。并害其外孫孫女矣。汝母善理財。幸汝家祖德深厚。故兄弟姊妹。皆賢善和睦。或於一人。有偏私愛。亦不至彼此計校。然不可以此爲法。須令兒女永無計校之嫌隙可生。及倚恃之驕情長起。庶幾家道興而子孫通皆循規蹈矩矣。光之性情多絡索。以汝兄弟。以光爲師。恐後來或致兒女受害。故爲絮叨及之。切勿謂所說無因。視作廢言。幸甚。但祈汝兄弟認真念佛。則爲報母之恩。亦爲報佛之恩矣。

孟由慧鑑。火葬。唐宋佛法盛時。在家人多用之。然宜從俗葬埋。恐執泥者妄生議論。實則燒之爲易泯滅。過七七日燒彌妥。葬之年辰久。或致骨骸暴露耳。三年之喪。不作禮樂。固宜遵守。前清文官必丁憂。武官不丁憂。以軍事不可或輟。故不爲制。今則廢倫非孝。紛紛而起。守制之期。尙足挂齒乎。吾人當依古禮。斟酌行之。不可遽變。不必過泥可耳。頂聖眼。天生等說。實可依據。光恐無知者。唯以探冷熱爲事。意謂有信願及臨終正念分明。即可往生。不得專以探冷熱爲據。故云亦不一例。恐其探之頻數。或致誤事。不可不知。大寶積無量壽如來會所說。乃說此等墮疑悔者。名爲胎生。亦有謂爲疑城者。此約障礙隔礙之義。立胎生疑城之名。以在蓮華中五百歲。不見佛聞法。何得死執其字以說義。將謂此等不在九品之數乎。須知西方無胎生。亦無城郭。乃約不能卽出蓮苞。及與佛相隔之義。喻取於胎於城。汝遂執定其詞。謂此在蓮品之外。然則下品中生六劫。下生十二劫。則其胎其城。爲更厚更遠矣。彼十二劫者。尙歸九品。何五百歲者。便居品外。又何不觀於蓮華中不能出現八字。是蓮爲不

列九品之蓮乎。佛法本無可說。一死執。則無事生事。便費盡筆墨矣。總因自己居於疑胎。其爲城也。厚逾鐵圍。果能直下明了。則大地平沈。鐵圍了不可得矣。孟子謂以意逆志。是爲得之。只此逆字。亦是疑城。若知逆卽迎合之意。則疑城化爲烏有。一般死執著漢。所以終日講說。終日違背。皆坐此死執著之病根未消。故致難得實益也。

丙寅三月初二

附錄一 唐三藏法師玄奘傳 節要

二月四日夜半。瞻病僧明藏禪師。見有二人。各長丈許。共捧一白蓮華如小車輪。華有三重。葉長尺餘。光淨可愛。將至法師前。擎華人云。師從無始以來。所有損惱有情。諸有惡業。因今小疾。並得消殄。應生欣慶。法師顧視。合掌良久。遂以右手而自揩頤。次以左手申左脰上。舒足重累。右脇而臥。暨乎屬纊。竟不迴轉。

附錄二 印光老人復黃涵之道尹書 節要

昨得初十手書。知尊夫人確得往生。了無疑慮。其宿世固於淨土法門有大栽培。惜

閣下提倡較晚。倘於十年前即提倡。俾淨土法門之若事若理。一一明了。兼以力修。則其淨業之成。當比此高數倍矣。平時愛子心重。自顧劣弱。至臨終時。則反能擺脫情愛。決志求生。乃宿世善根所使。平時面東臥。終時面西右脅。亦宿善根力所使。有不期然而然者。有臨終種種景相。即可決其往生。并無須驗其頂胸之熱。何處先涼也。至於作佛事。不必念經拜懺。做水陸。以此等事皆屬場面。宜專念佛。俾令郎等亦始終隨之而念。女眷則各於自室念之。不宜附於僧位之末。如是。則不但尊夫人令眷。實獲其益。即念佛之僧。并一切見聞。無不獲益也。凡作佛事。主人若肯臨壇。則僧自發真實心。倘主人以此爲具文。則僧亦以此爲具文矣。如一期佛事已畢。夜間放臺燄口。即已。光以四十三年之閱歷。謹爲知己者陳之。若不以爲迂腐。則幸甚幸甚。念經拜懺。做水陸。何以不及念佛。以念佛。人皆能念。故念經。則雖有百僧。念者難得有五十人。有不識字者不念。有識字口齒鈍。其快如流不能隨。亦不念。有懶坏。雖能念而不肯念。故成虛文者屬多半。念佛則無一人不能念。即懶坏不肯念。然大家一

口同音念此極熟之六字佛號。彼若不塞耳。則此六字。歷歷明明。由耳根以灌入八識田中。其人心。固一句一句之南無阿彌陀佛。從始至終。常得顯現。雖不念。與念之功。德亦差不多。況一切來往之人。孰是塞耳不肯令聞之人。既不塞耳。則亦以此六字。由耳根以灌入八識田中矣。一句染神。永爲道種之利益。唯念佛獨有。念經則無者。以文句各異。不熟者不知所念是何文。卽熟者不攝心諦聽。亦難了了。光之愚誠。不僅爲尊夫人計也。

附錄三 印光老人臨終助念發隱 節要

臨終一關。最爲要緊。世有愚人。於父母眷屬臨終時。卽爲悲痛哭泣。洗身換衣。只圖世人好看。不計貽害亡人。不念佛者。且置勿論。卽志切往生。臨終遇此眷屬。多皆破壞正念。仍留此界。臨終助念。譬如怯夫上山。自力不足。幸有前牽後推。左右扶掖之力。便可登峯造極。臨終正念昭彰。被魔眷愛情搬動等破壞者。譬如勇士上山。自力充足。而親友知識。各以己物。令其擔負。担負過多。力竭身疲。望崖而退。此之得失。雖

由他起。實屬自己往昔劫中成全破壞人之善惡業力所致。凡修淨業者。當成全人之正念。及預爲眷屬示其利害。俾各知所重在神識得所。不在世情場面好看。庶可無虞矣。

錄附四 印光老人爲任印觀音頌者回向偈

猗歟觀世音。誓願難思議。久成等正覺。復現菩薩身。隨類而逐形。尋聲以救苦。可惜世間人。多多皆不知。故特著此書。冀得廣流布。幸蒙諸善信。任印已數萬。從此屢續知。屢續相任印。能至數十萬。庶慰菩薩心。又復徧翻刻。中外廣傳佈。俾知觀世音。實一切依怙。譬如大火炬。普照於昏衢。亦如巨鐵輪。普渡諸沈溺。盲人之導師。病夫之醫藥。寇賊時城郭。饑饉時稻糧。須知菩薩恩。踰天地覆載。縱盡劫宣揚。亦止示少分。願諸任印者。業障悉消除。福慧咸增長。諸凡皆如意。生則獲五福。沒則登九品。過去諸祖宗。資之生淨土。現在各椿萱。咸皆獲壽康。所有子與孫。悉能振家聲。年歲常豐登。盜賊悉革心。家家崇慈善。處處行仁義。

俾此澆薄俗。轉作淳樸風。法界諸有情。同得圓種智。

附錄五 蓮根法師送亡要語 節要

佛說人有八識。卽知識也。前五識名眼耳鼻舌身。六意識。第七末那。亦名傳送識。第八阿賴耶。亦名含藏識。夫人之生也。惟此第八識。其來最先。七六五識。次第後來。及其死也。亦此八識。其去最後。餘識次第先去。蓋第八識卽人之靈識。俗謂靈魂者是也。然此識既靈。故人初受母胎時。彼卽先來。故兒在母胎中。卽能活動。至人死氣斷之後。彼不卽去。必待至通身冷透。無一點煖氣。彼識方去。識去。則此身毫無知覺矣。若有一處稍煖。彼識尙未曾去。動著觸著。仍知痛苦。此時切忌哭泣穿衣搬動等事。若稍觸著。其痛難當。不過口不能言。身不能動耳。經云。壽煖識三者。常不相離。如人身有煖。則有識在。識在則壽尙未終。古來多有死三五日而復生者。詳載典章。歷歷可考。儒教有三日大殮之禮。緣眷屬恩愛。尙望其萬一復生耳。若我佛教。雖不望其復生。而不能不體其痛苦。遽爾動觸。且人情痛苦之極。瞋心易起。惟瞋心故。最易墮

落。如經云。阿耨達國王。立佛塔寺。功德巍巍。臨終時。侍臣持扇。誤墮王面。王痛起。瞋死。墮蛇身。後遇沙門。爲其說法。方得生天。觀此。可知亡者。識未去時。卽行穿衣。搬動及焚化等。使其因痛生瞋。以致墮落。寧非忍心害理。無如世俗習以爲常。縱有言及此者。反笑以爲迂腐。致令亡者有苦難伸。嗚呼。世之最苦者。莫過生死。生如活龜脫殼。死如螃蟹落湯。八苦交煎。痛不可言。願諸照應臨終人者。細心謹慎。切莫與談雜話。令心散亂。亦勿悲哀喧嘩。卽籌後事。亦勿令其預聞。只須緩語低聲。勸他念佛。大眾齊聲。助他念佛。令生西方。聽其氣絕。隨他或坐或臥。切莫移動。待至身體冷透。亦不可頻頻探摸。過三小時。方可洗浴穿衣。如身冷轉硬。應用熱湯淋洗。將熱布搭於臂肘膝灣。少刻。卽可回輒。固無須過慮。急爲轉捩伸展。夫生死事大。人人所不能免。惟此一著。最宜慎重。伏祈一切善信。俯察鄙言。實爲至幸。

法雨涓滴錄一書。于臨終助念。及洗沐換衣哭泣等。破壞正念之利害。頗有發明。周師導之母。幸得助念之力。故得正念昭彰。現諸瑞相而終。由是彼昆季石印數百冊。以送遠近有緣者。今又以母所遺資。印蓮宗正傳一萬冊。以結淨緣。冀其母未往生。則卽得往生。已往生則高增品位。因將此錄。附于其後。冀一切人咸知助念。及破壞之利害。庶不至以愛親。及愛兄弟妻子眷屬者。背道而馳。以愛戀之心。行損害之事。尙自以爲吾于亡者。能盡其職。但以凡夫知識陋劣。未聞佛法。所有損益。人孰得知。此書傳布遐邇。庶一切正信念佛者之父母兄弟妻子眷屬。生則深種善根。沒則神超淨土。此法乃唐善導和尚所發明。謂平日不念佛者。依此助念。亦可往生。善導和尚。彌陀化身。是知此法。利益宏深。普願見聞。咸生正信。展轉勸導。功德無量。待己臨終。決定有助念之人。何以故。以如是因。感如是果。因果兩各相符故。民國十八年己巳九月普陀法雨寺挂搭僧釋印光跋。